

Givim olgeta Ful kala na traipela print antap long olgeta glosi kad wantaim ol envelop

Famili na Poroman or Poromeri
wanpela naispela
KRISMAS kad
long dispela via!

K2.20

lon wanwan sais (A6) pepa
Oda mak inap long 100 kopi tasol
Wanpela singel kala wol or piksa tasol, ino wantaim grafik disain
• A6 105mm x 145mm

Only at...
THEODIST LTD
THE STATIONERY SUPERMARKET
WAIGANI DRIVE, POM PH: 313 9800
MARKHAM ROAD, LAE PH: 472 5488
printquotepom@theodist.com.pg printquotevae@theodist.com.pg

Sensasip Opis i holim sensasip awenes woksop - P3

Fri edukesen mekim tisa kisim hat taim - P6



Australia helpim Angau Haus sik long senisim Skul ov Nesing - P9



Awenes long Sensasip woksop...

: Sif Sensor, Steven Mala (sindaun namba 2 long lephan) i sindaun namel long Ekting Seketeri, Dipatmen bilong Komunikesen na Infomesen, Koreken Levi na NBC Dairekta Provinsal Stesen, Michael Samuga wantaim olgeta opisa bilong PNG Sensorship opis, PNG Kastoms na ol ripota bilong ol media kampani. PNG Sensorship Opis i bin holim tupela woksop long March Girls Motel ausait long Pot Mosbi long las wik long kamapim awenes long wok bilong ol wantaim ol jenelis long Pot Mosbi. Lukim stori long pes 3.. *Poto: Sensorsip Opis Media.*

Planti senis i daunim rait bilong ol yangpela sumatin

Esther Bralyn Wani i raitim

PAPUA Niugini i kirapim luksave long ol kain kain rait bilong ol pipel insait long kantri. Wanpela bilong ol em rait bilong ol pikinini long skul.

Luksave na strongim ol rait i kirap long 20 de ektivisim we i stat long dispela wik Trinde na bai pinis long Disemba 12.

Long dispela, Konsaltiv Implimentesen na Monitoring Kaunsel (CIMC) aninit long Institut bilong Nesenel Afes (ina) i wok bung wantaim World Vision, Safe

Motherhood Alliance PNG, UN Women na Child Fund long luksave long dispela 20 de wantaim het tok 'Safe Home to Safer Communities: Education is for All'.

Eksekyutiv Dairekta bilong Institut bilong Nesenel Afes, Paul Barker i tok, 'Dispela edukesen sistem i kisim planti sumatin long skul nau, tasol planti bilong ol pikinini i no save go long skul bikos ol i pret o papamama i no salim ol i go.'

'Mipela i save olsem planti komyuniti i save stopim ol human rait. Tasol gavman na papamama i gat wok

long salim ol pikinini i go long skul. Papamama i mas lainim ol pikinini long haus insait long gutpela en-vairomen pastaim long ol i go long skul,' Mista Barker i tok.

Long wankain taim, prinsipel bilong Gerehu Sekenderi Skul, Martin Kenehe i tok, 'Edukesen sistem long PNG i bin senis planti taim stat long independens i kam inap nau. Bikos long dispela, pablik edukesen sistem bilong yumi i no gat wankain sans long gro tasol i senis planti taim.

I go moa long pes 2...



Faster Higher Smoother Quieter

Daily Jet services to Alotau and Hoskins on the Fokker 70

Call Toll Free on 180 3444 or contact your nearest Air Niugini Travel Centre or Travel Agent.

Air Niugini  
www.airniugini.com.pg

Edukesen Dipatmen bai rausim Gret 8 na 10 eksam

Ol bai rausim tupela nesanel eksam long givim olgeta pikinini husat i enrol long elementri wanpela sans long pinisim edukesen inap Gret 12, wantaim wanpela gutpela asesmen sistem i kisim ples bilong eksam.

Dispela ripot i go aut long stretim sampela ripot i no tru na tok klia long tingting bilong Ministri long rausim Gret 8 na 10 ol eksam bilong ol seleksen wok long narapela 6-pela yia.

Ektig Seketeri bilong Edukesen, Dokta Uke Kombra i tok, 'Tupela nesanel eksam bai go het long larim sumatin i mekim gut long Gret 8 na 10 olsem poin bilong go aut. Long wan wan yia, edukesen sistem i save pusim olsem 100, 000

sumatin aut bikos long dispela ol eksam.'

'Olgeta pipel long Papua Niugini i gat ol save na tingting we God i givim na ol i mas gat sans long pinisim gret 12 edukesen. Gret 12 edukesen bai kamap liklik mak bilong olgeta pikinini. Dispela Tuisen Fi Fri Polisi i statim wok bilong gavman long ol pipel na kantri bilong yumi,' Dokta Kombra i tok.

'Wanpela stendet bes asesmen bai kisim ples bilong ol dispela eksam we bai i glasim pefomens bilong ol sumatin na givim setifiket long soim gutpela wok bilong ol tasol i no bilong seleksen long go insait long Gret 9 na 11,' Dokta Kombra i tok

Dokta Kombra i tok dispela

eksam sistem mipela i gat insait long PNG na wol em i wanpela rot bilong edukesen na trening. Eksam em i gutpela long ol skul bilong yumi long painim aut trupela save, ol skil na strong bilong ol sumatin. Long wanem, ol sumatin i lainim samting insait long skul bai ol i asesim insait long ol intanel skul asesmen sistem long kain kain taim bilong lainim.

Dokta Kombra i tok long PNG, yumi save yusim eksam long painim aut trupela save bilong wanpela sumatin na bilong mekim seleksen na kisim spes bilong ol sumatin na promotim sumatin long narapela level.

Em i tok dispela tingting na prektis bilong seleksen na drop aut em

i pasin bilong ol tumbuna we yumi i no bin rausim inap indipendens. Em i tok edukesen sistem i bin rausim ol sumatin bihain long Gret 6, 8 na 10 na makim ol 'drop aut' bikos i no bin gat inap klasrum na i no gat inap tisa long kain kain level bilong edukesen sistem.

Dokta Kombra i tok dispela tumbuna toktok 'drop aut' i mas stop long givim olgeta sumatin wanpela sans long muv long elementri prep inap Gret 12, na dispela em wanpela stretejik polisi bilong longtaim yet.

Wanpela ministri daireksen aninit long Seksen 27 bilong Edukesen Ekt (1983) we Dipatmen bilong Edukesen i toktok wantaim ol provins na stekholda olsem ol

provinsel gavman, ol sios ejensi na Distrik Developmen Atoriti na plen wantaim ol sapot bilong developmen patna long hariap na apim tisa trening na ol infrastraksa long rausim 'drop aut' pasin na larim olgeta sumatin i mekim elementri prep i pinisim gret 12.

Dipatmen bilong edukesen i karim aut wanpela bikpela wok long rausim Gret 8 na 10 eksam bilong seleksen wok na long lukluk bilong ol bai ol i kamapim wanpela klia taim frem long implementim dispela daireksen.

Dokta Kombra i tok, 'Long rausim dispela seleksen pasin long Gret 8 na 10 bai stat long neks yia insait long sampela provins.

NEC i tok orait long Turisim Zon Sapot plen

NESENEL Eksekutiv Kaunsil (NEC) i tok orait long senisim Turisim Zon Sapot Inisitif, we i stopim husat i gat Australia paspot long kisim visa long taim ol i kamap long olgeta hap long Papua Niugini.

Praim Minista Peter O'Neill i tok aut long dispela bihain long palamen i skelim gen dispela toktok na lukim olsem em i gat bikpela helpim long kirapim turisim sekta bilong yumi.

'Dispela tok orait em long larim ol turisim kisim visa taim ol i kamap taim Air Niugini

ini i statim wanpela mendotori trensit long Gani ples balus long Milen Be provins, long dairek flait i go long Kokopo, Is Nu Briten provins.

Palamen i tok orait olsem balus i ken mekim ran tupela taim insait long wanpela wik na Gani na Maun Hagen bai kamap ples balus bilong kam insait long kantri na Pot Mosbi tu long olgeta intanesenel flait. Dispela em ol Lahir sata i kam insait long PNG,' Praim Minista O'Neill i tok.

Em i tok ol turisim bilong Australia i ken

kisim visa bilong ol taim ol i kamap long Gani na Maun Hagen taim ol i lusim Brisbane.

'Dispela gavman i go het long promotim kain kain kalsa bilong yumi na histori bilong Wol Wo II taim ol i kisim ol turis i kam long ovasis,' Praim Minista i tok.

Em i tok turisim indastri em i wanpela bikpela rot bilong mekim reveniu bilong kantri bilong yumi na kamapim planti wok bilong ol pipel long PNG.

Kabinet i tok orait tu long K20 milien bilong

turisim zon developmen fan long baset bilong 2015 bai ol i yusim long sapotim long stretim ol infrastraksa na ol flait subsidi na ol narapela wok.

'Air Niugini i wok bung wantaim Link PNG, bai i developim turisim trenspot long Gani na Tokua long givim sevis long Popondeta, Losuia, Arawa, Kimbe, Kevieng, Manus, na long Maun Hagen bai givim sevis long Madang, Wewak, Mendi na Goroka,' Praim Minista O'Neill i tok.

NEC i tok orait long plen bilong NHC

NESENEL Eksekutiv Kaunsil (NEC) i tok orait long ol Sosesel Hausing Developmen projek bilong Nesanel Hausing Kopresen (NHC) long ol pablik sevan na ol pipel bilong Papua Niugini (PNG).

Praim Minista Peter O'Neill i tok kabinet i tok oraitim hausing projek long wanem em i longpela tem plen bilong gavman long toktok long hausing nid bilong ol pablik sevan na ol pipel bilong PNG.

'NEC i tok orait long Nesanel Hausing Kopresen long go hetim sosel hausing skim long Duran Fam long 8 Mail, Gerehu Stej 7

na Nesanel Risets Institut (NRI) projek long Pot Mosbi.

'Em bai stap bilong ol pablik sevan na ol pipel long baim na gat ol haus we bai kamap, salim na skelim aninit long sosel hausing skim tingting.

'Gavman insait long NEC i tok orait long Hausing Kopresen long katim namel long K250 000 na K450 000 graun o haus pekej aninit long K200 milien mogej fasiliti o dinau bilong Benk Saut Pasifik (BSP) na gavman long BSP na ol narapela benk,' Praim Minista i tok.

Praim Minista i tok NEC i tok orait long 100 hap graun bilong olgeta gavman dipatmen na SOE's bilong ol institusen hausing spes o wan wan hap bilong ol long bildim na gat haus bilong ol yet.

'NEC i tok orait long PNG Kastoms na PNG Pots long Waiver Impot Levy na Storej na Handling fi long olgeta bilding prodak ol i kisim kam long narapela kantri bilong bildim ol haus long 8 Mail, Gerehu Stej 7 na NRI long daunim kos bilong bilding na konstraksen long ol pipel bilong Papua Niugini long baim haus na gat haus long gutpela prais.

Eda Ranu i kisim daireksen long fanim wara na surij sevis long Duran Fam, Gerehu Stej 7 na Nesanel Kapitol Distrik Komisn bai fanim olgeta rot netwok long olgeta dispela ol projek hap.

'Telikom PNG i kisim daireksen long putim ol telekomyunikesen infrastraksa long ol dispela projek hap,' Praim Minista i tok.

Em i tok gavman i plen long bildim olsem 40, 000 haus bilong ol pablik sevan na ol pipel long luksave olsem ol pipel i slip long gutpela haus na go long wok na helpim kantri.

'Ol i painim pinis 5-pela konstraksen kampani na tok orait long karim aut namba wan konstraksen wok bilong 5, 000 haus we ol bai wokim wan wan 1, 000 haus long strong bilong ol yet aninit long Bild, Sel na Sea (BSS) aidia aninit long gutpela agrimen wantaim NHC long sait bilong disain, kos, diliveri, taim frem, maketing na serim ol wok.

'Wantaim K50 milien ol i givim long dairek mani i stap long 2016 Nesanel Baset bilong NHC long tingim rent mani bilong ol pablik sevan ol i bai rausim tasol i no long NHC,' Praim Minista O'Neill i tok.

Planti senis daunim rait bilong ol sumatin

I kam long pes 1...

Mista Kenehe i tok planti bilong ol Edukesen seketeri na ol Minista bilong edukesen i no save stap longpela taim long opis na dispela save mekim ol polisi i senis olgeta taim. Em i tok dispela i mekim ol sumatin i no pinisim edukesen bilong ol gut bikos long ol eksam long Gret 8 na 10.

Em i tok rausim dispela Autkam Bes Edukesen (OBE) i soim olsem ol i no tingting gut bikos sampela

bikpela samting i stap yet olsem; nogat inap ol insevis na trening i kamapim ol tisa i no save skulim ol pikinini gut, nogat inap ol risos olsem teks buk bilong wan wan sumatin na planti bilong ol bikman bilong mekim disisen i bin tis long klasrum bipo tasol ol i lusim pinis pasin bilong tis long klasrum na long save bilong ol nupela pasin i kamap long klasrum.

'Edukesen sistem bilong

na i rausim ol sumatin long Gret 8 na 10 we ol i ken pinisim edukesen bilong ol long Gret 12. Dispela polisi i bagarapim rait bilong wanpela pikinini long pinisim edukesen bilong em,' Mista Kenehe i tok.

Em i tok wanpela pikinini i gat rait long stap insait long skul inap Gret 12 aninit long Kompalseri Edukesen Polisi.

Dispela 20 de bilong Human Raits Ektivisim bai

lukim ol kain kain human rait ektiviti olsem, yunivesel de bilong ol pikinini, intanesenel de bilong stopim vailens egensim ol meri, intanesenel women human raits difenda de, intanesenel HIV na AIDS de, intanesenel de bilong disebel pipel, volantia de, intanesenel anti korapsen de, intanesenel human raits de na wol de egensim pasin bilong stilim na haitim narapela man.

No charges to call customer care from the friendlier network

Switch to bmobile-vodafone at a store near you.

www.bmobile.com.pg

Connect with us on

76003555

bmobile | Vodafone

Sensosip Opis i holim sensasip awenes woksop

Frieda Sila Kana i raitim

OPIS bilong Sensosip long las wik i bin holim tupela de woksop bilong kamapim awenes wantaim ol midia long ol wok em i save mekim insait long kantri.

Sif Sensa, Steven Mala wantaim Deputi Sif Sensa Jim Abani i bin stap long mekim toktok na strongim tingting bilong ol jenelis na ol narapela wokman na meri bilong midia long ol bikpela wok we sensasip opis i save mekim insait long komyuniti na long kantri.

Sif Sensa Mala i bin tok olsem dispela woksop em i kamap long strongim wok bung wantaim bilong opis bilong em na midia.

"Planti developmen i kamap long komyunikesen teknoloji we i gat gutpela bilong en na no gut bilong en long ol komyuniti bilong yumi. Sensasip opis i luksave long wok bilong midia long skruim toktok i go long ol yangpela man na meri na pikinini na komyuniti.

"Ol ripota na nius rida long TV na radio i gat bikpela wok insait long komyuniti. Nau i gat ol piksa na toktok doti i stap long komyuniti bilong yumi na yumi olgeta mas wok bung long banisim ol pikinini bilong yumi long tingting bilong ol i no ken

bagarap. Yupela i no ken tingim olsem em wok bilong yupela tasol, nogat. Yupela i mas tingim olsem yupela tu i gat asua long salim gutpela na klinpela tok stia i go aut long ol pablik," Mista Mala i tok.

olsem na Sensasip i laikim ol nius ripota na ol edita i mas kisim klia tingting long ol hevi nau i save kamap long wei bilong komyunikesen na teknoloji wantaim ol mobail fon," Mista Mala i tok.

Wantaim ol tok awenes bilong ol opisa bilong Sensasip Opis, i bin gat ol ges spika i kam long makim ol arapela patna na stekholda olsem, Kastoms Opis, Dipatmen bilog Komyunikesen na Infomesen, PNG Midia Kaunsil, Nesanel Brodkasting Koporesen, Midia Developmen Inisetiv na wanpela nius ripota i makim ol jenelis long tingting bilong ol long wok bilong sensasip.

Dispela em i namba wan taim long Sensasip Opis i holim dispela kain bung bilong ol midia tasol em i bin kamap gutpela tru.

Sensasip Opis em i stap aninit long Dipatmen bilong Yut, Sios na Komyuniti Developmen na ol i gat 25 wokman na meri tasol long lukautim 7.8 milien populesen na dispela em i bikpela wok stret. Long dispela as, Sensasip opis i luksave

olsem midia inap long kamap maus na iau na ai bilong sensasip long olgeta hap bilong dispela kantri.

I gat bikpela wok i stap long mekim moa awenes tasol ol i no gat inap mani long baset bilong ol. Mista Mala i tok, em i bilip olsem bihain long tupela de woksop olgeta midia lain bai klia gut long wok bilong sensasip na karim wok i go aut long komyuniti.

"Mipela bai no inap long go na kisim olgeta ponograpi

samting we i bagarapim tingting bilong ol yangpela tasol mipela bai kamapim awenes toktok. Mipela bai strongim ol yangpela bilong mipela long lainim na holim strong gutpela pasin kalsa na pasin lotu bilong yumi," Mista Mala i tok.

Dairekta bilong Stratejik Polisi na Kodinesen long Opis bilong Sensasip, Ilikomau Freda Ali i tok, dispela em i namba tu taim long Sensasip i bin bungim ol memba bilong midia kaunsil.



Sif Sensa, Steven Mala.

Nesanel Egrikalsa Insek Koleksen ples i op gen

NESENEL Egrikalsa Risets Institut (NARI) i opim gen laborator bilong ol bungim ol binatang long Kila Kila opis long Pot Mosbi.

Dispela fasiliti i op gen long Tunde 10 Novemba i kosim K500, 000. Em i bikpela samting i kamap long NARI; dispela fasiliti i gat 200, 000 binatang ol i bungim long olgeta hap long PNG, we ol i bin bungim long 1940. Namel long ol dispela binatang, em dispela bataplai Queen Alexander bataplai o Onitopetra Alexandrae.

Dairekta Jenerel bilong NARI, Sergie Bang, i tok olsem risets na bungim ol kain kain binatang, i soim kain kain ol binatang yumi i gat long PNG. Em i tok olsem bikpela samting long ol dispela binatang ol i bungim ol i save skelim long stail bilong en na histori bilong en.

Mista Bang i tok ol dispela bung em i bikpela risos long sapotim baiodaivesiti na salim ol komoditi o ol samting kantri i groimbilong PNG i go autsait long narapela kantri na go het long mekim risets developmen long PNG.

Em i tok moa olsem klaimet senis i kamapim

hevi long ol komyuniti insait long kantri, ol binatang i no save givim hevi long ol kaikai i ken kamap birua long ol kaikai nau. Long wanem long stadi long ol ikoloji o ples we ol binatang i save stap long en long ol dispela binatang i ken kamapim wanpela hap bilong ol pipel i save mekim risets long kamap wantaim ol rot long long kontrolim ol dispela binatang na sapotim ol fama na husat i save kisim strong long ol kaikai bilong gaden.

Long wankain taim, Menesing Dairekta bilong PNG Risets Sains na Teknoloji, Dokta Kulala Mulung, i tok bungim ol binatang em i bikpela samting long sait bilong kaikai na baio-sekyuriti long bihain taim we ol binatang i gat bikpela wok tu.

Em i tok em i sori long lukim olsem dispela eria ol i no givim luksave long en long longpela taim; long wanem PNG em wanpela bilong ol kantri we ol i no save bagarapim ol binatang.

Dispela i kamap long wankain taim we PNG Risets, Sains na Teknoloji Sekreteriet i karim aut wanpela asesmen long olgeta Risets, Sains na Teknoloji fasiliti.

Thank you **BSP!**

"BSP Home Loan helped us to purchase our first house. Our son now has his own room. We have our own kitchen and a whole yard to host a family Kaikai."

David Jonah
First Home Buyer



A range of home loan products for first home buyers and existing home owners.

 FIRST HOME OWNERSHIP	 HOME LOAN
1. Maximum Loan K400,000	1. Flexible Loan Amount
2. Interest Rate 4% pa	2. Interest Rate 8.45% pa
3. Maximum Term 40 years	3. Maximum Term 25 years
4. Equity 10%	4. Equity 30%



320 1212 / 7030 1212 - 24/7
 servicebsp@bsp.com.pg
 www.bsp.com.pg f t i n



PNG na India kamapim strongpela poroman

PRAIM Minista Peter O'Neill i bungim nupela Hai Komisina bilong India i kam long PNG, His Ekselesi, Shri Nagendra Kumar Saxena.

Hai Komisina Saxena i kisim ples bilong Dokta AJ Gondane, husat i pastaim hai komisina bilong India i kam long PNG.

Mista Saxena i bungim Mista O'Neill long las wik Fonde long Pot Mosbi na i tok wokbung na poroman namel long India na PNG i wok long gro.

Mista O'Neill i tok tenkyu long sapot India i wok long givim long PNG long infomesen teknoloji (IT) na edukesen.

"Wokbung namel long India na PNG i wok long kamap strong,"Mista O'Neill i tok.

"Mi bin amamas stret long go lukim India na bungim Praim Minista Modi (bilong India) long mun Ogas dispela yia long namba 2 foram bilong India-Pasifik Ailans Kopresen.

"Ol wok India i wok



Prait Minista O'Neill na Indian Hai Komisina, Shri Nagendra Kumar Saxena

long mekim long kirapim ol Pasifik Aillan kantri i kisim luksave na mi laik tok tenkyu long long dispela gutpela samting India i mekim. Dispela wok bai go het yet na gavman i laik wokbung wantaim India.

"India i nidim eneji na mipela i bilip olsem India bai kamap wanpela kastoma bilong nupela LNG projek we Total SA i go pas long kirapim.

"PNG bai sanap wantaim India na sapotim India long bringim sam-pela senis long Yunaited

Nesens Sekyuriti Kaunsil we India i laik kamap wanpela pemenen memba,"Mista O'Neill i tok.

Mista O'Neill i tok ol lida na hai level gavman opisal bilong PNG na India i wok long i go i kam long tupela kantri na namba bilong dispela kain raun i wok long go antap.

"Mi salim tok i go pinis long Presiden bilong India, Shri Pranab Mukherjee, long kam raun long PNG long bi-hain taim.

"Prait Minista Modi bilong India bai kam raun long PNG long namba 3 foram bilong India-Pasifik Ailans Kopresen neks yia,"Mista O'Neill i tok.

Mista O'Neill i tok tenkyu long Mista Saxena i kamap maus man bilong India long PNG na insait long taim bilong en olsem hai komisina gavman i gat bilip olsem em bai mekim planti gutpela wok long larim wokbung namel long tupela kantri i kamap strong moa.

PNG i autim tok sori

PRAIM Minista Peter O'Neill i tok aut long kain nogut pasin long dai i kamap long Frans long las wik Fraide.

Prait Minista O'Neill i autim tok sori bilong Papua Niugini (PNG) i go long ol pipel na gavman bilong Frans.

"Dispela em i nogut pasin stret long lusim laip long kain dai," Prait Minista i tok.

"Pre bilong ol pipel long PNG i stap wantaim ol pipel long Frans taim mipela i lukim long

piksa na tingting olsem bai i nogat moa dai i kamap.

"I no gat wanpela tok-tok mipela i ken mekim long kain nogut pasin i kamap tasol mipela i pilim sori tru long dispela kain ol pasin," Prait Minista O'Neill.

Em i tok global komyuniti na ol kantri i save wanbel na stap i mas wok bung long mekim samting long kain birua i noken kamap gen.

Prait Minista i tok ol

polis i mas painim ol pipel husat i stap insait long dispela birua pasin na mekim save long ol na painim as bilong dispela nogut pasin.

"Dipatmen bilong Foren Afes na Papua Niugini Embasi long Brusels bai wok wantaim ol atoriti bilong Frans long painim ol infomesen long ol pipel bilong PNG husat i stap long Frans nau taim kantri i stap long hevi tu," Prait Minista i tok.



Mis Pasifik Balens Fan Abigail Havora husat i winim Mis Pasifik Ailan Pejen (MPIP) i sanap wantaim ol wan wok bilong en. Ol wan wok bilong em i werim ol taitel em i winim long en. EM bai go long Cook Ailan long resis wantaim ol narapela pasifik ailan

Ol senia lida long CS i trening



Piksa i soim ol Koreksenal Sevis opisa, husait i stap insait long trening, na wantaim CS Komisina, Michael Waipo, ol Senia Eksekutiv na ol Senia Menesa.

OL senia lida bilong Koreksenal Sevis (CS) i stat trening long Mande, Novemba 16 inap Fraide 27.

Dispela em i Senia Lidasip Trening we ol bai holim insait long tupela wik na i gat 14 senia koreksenal opisa i stap insait long dispela trening.

Abby Konsalten i sapotim dispela trening.

Long taim bilong opim dispela trening, Komisina bilong CS, Michael Waipo, i tok, "Mipela i kamapim dispela trening CS, long lusim ol tradisenel we bilong operesen na bi-hainim ol nupela we bilong lidasip na menesmen senis i kamap long en."

Komisina i salensim ol opisa husat i stap insait long dispela tren-

ing long kamap namba wan opisa long senisim koreksenal sevis na kantri long stretpela wei na pasin i tru.

Na em i laikim ol long wokim wok stret na aninit olsem komand-ing opisa na Menesa long wan wan koreksenal institusen bilong ol.

Dispela program bai kamap gen long yia i kam, 2016.



Word Publishing Company Ltd

P. O. Box 1982, Boroko, NCD 111, PNG. Tel: (675) 325 2500 Fax: (675) 325 2579
Email: seovo@wantok.com.pg / word@wantok.com.pg

Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the WANTOK to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)
PNG K220.00, Australia/New Zealand US\$110.00, Asia/Pacific US\$150.00
Rest of the World US\$210.00

NCD HOME DELIVERY
K0.80t per copy or K65.00 for two or more copies & Office pickup K52.00 per year for a copy.

Please send me _____ copy/copies of WANTOK for one year.

I enclose Kina/USD _____ as full payment.

Name _____

Postal Address _____

City _____

State/Province _____

(abbreviation)

Country _____ Zip/Postal Code _____

Street Address _____

Telephone _____ Fax _____

Email _____

Signed _____ Date _____

Publisher of



Embeseada bilong Korea raun long Nu Ailan

Ahimsa Kibikibi i raitim

EMBESEDA Kim Seong Choon bilong Ripablik bilong Korea i bin raun i go long Nu Ailan na bung wantaim Gavana Sir Julius Chan.

provins long givim toktok long Nesenel Fiseris Kolis, tasol long bung long em wantaim Sir Julius Chan, i bin taim long toktok long ol wankain tingting tupela i gat long ol bikpela projek, fiseris na tu wok turis.

Sir Julius i bin mekim inap taim

long bungim embeseada maski em i bin bisi tru wantaim ol miting bilong Provinsal Implimentesen Komiti na tu, Provinsal Ekseyutiv Kaunsel.

I bin gat presen bilong Malagan na mimis long ol opis blong Gavman. Bikpela lukluk o tingting long

dispela toktok wantaim Embeseada Kim em long promotim wok mani na invesmen insait long Nu Ailan.

Embeseada Kim em i tingim yet gutpela poroman, Sir Julius, i bin statim taim em i bin stap Minista bilong Fainens we em i bin strongim

wokbung wantaim ol kampani olsem Haller Cement na Hyundai na tu, em i bin kisim wanpela honareri iekonomik digri long Dankook Yuniversiti, wanpela long ol bikpela skul tru long Seoul, Korea .



Sir Julius wantaim Embeseada Kim Seong Choon bilong Ripablik bilong Korea i bung toktok long opis bilong Sir Julius long Kavieng. *Poto: Ahimsa Kibikibi*

ELC PNG meri kamap long Gutnius konprens

Paulus Tali i raitim

Nesenel Het meri Dairekta bilong Evanjelikal Luteran Sios, Cathy Mui husat i bin mekim namba tu wok-abut bilong em i go long EIC Boana, Distrik long Sugu peris, em i bin lukim moa long 550, Kristen bilong Boana, long 19 peris, i kamap.

Planti yangpela na dairekta bilong ol wokmeri tu lukim nupela senis we EIC Boana, i mekim long bihanim het tok, Gutnius Konprens, na em i gutpela konprens bilong sios, yumi i no ken toktok planti long bisinis, na arapela samt-ing, mas toktok long Gutnius pastaim bihan na arapela samt-ing.

Misis Mui i tokim ol meri Boana olsem, "mi amamas long yupela long 2014 Nesenel Wokmeri Konprens we yupela i bin givim moa

taim long ranim konprens na em i kamap moa gutpela. Yupela kisim moa sapot long gavman na ol arapela ol liklik bisinis man na pasin bilong wok wanbel bin kamap gut tru wantaim yangpela lida meri bilong yupela Gabbiamo David."

Misis Mui i tok tu olsem, tok long 2014, ELC Boana, i bin kamapim nupela samting long wokim nupela straksa plen, bilong wokmeri program bilong EIC PNG.

"Olsem na mi kam long yupela long Boana long konprens em i no asua nogat.

Mi laik strongim yupela ol meri long luksave long nupela plen, Bikpela samt-ing em long Wok Mision insait long wan wan famili long strongim famili lain bilong ol long wan wan komyuniti bilong ol.

"Sios i gat driman long ol meri i mas sanap strong na strongim ol hauslain bilong ol. Long 1996 Wokmeri opis bin bihanim stia buk i kam inap 2014, nau dispela yia 2015, yumi mas lukluk long putim gen nupela plen, insait long Intergral Human developmen Siks' Pila; 1. Ikonmik, 2. Sosel, 3. Spirit, 4. Bodi, 5. Intelek o tingting, 5. Save long mekim wok. Misis Mui i tok, bungim han i bihanim sistem bilong divisinenel eksen plen," Misis Mui i tok.

EIC Boana distrik, Wokmeri Kodineta, Gabbiamo David, i tok amamas na tenkyu long Nesenel Wokmeri Dairekta long kam daun long distrik na soim plen bilong nupela Visen 2020, bai ol meri long peris, na kongrigesen inap lukim na bihanim.

U.S Embasi i sapotim GBV

YUNAITET Stet (U.S) embasi i amamas long toktok aut long tripela lokal non-gavman ogenaísesen (NGOs) i kisim awat insait long Embeseada Smol Grent Program.

Dispela i bin kamap gut long Imejensi Plen bilong AIDS Rilif bilong U.S Presiden (PEPFAR) bilong ol komyuniti bes projek long stopim jenda bes vailens long Papua Niugini (PNG).

Total mani olsem \$45, 000 ol i bin givim long PNG Kensa

Faundesen na Wimen Dokta Asosiesen bitok long PNG, long Pot Mosbi na Laswara Rurel Wimen projek long Kundiawa, long Simbu provins.

Taim ol meri dokta na ol Laswara i holim HIV/STI, sevikel kensa, na ol PAP smia testing klinik na ol awenes trening program, PNG Kensa Faundesen bai lukluk long sevikel kensa, HIV na STI awenes trening bilong ol sekenderi skul long Pot Mosbi bihain long

vesinesen kempen i op long human papilomavaires marasin, we i ken lukautim ol meri egensim sevikel kensa na bai i wok gut taim ol i givim long ol liklik meri na ol yangpela meri.

Dispela tripela projek i sapotim ol wok bilong PNG Nesenel HIV na AIDS Streteji 2011-2015, we i soim olsem jenda pasin i no ikwal o wankain na daunim pasin bilong i no gat strong long HIV bikos long seksual vailens egensim ol meri na ol liklik meri

em i namba wan isu we i katim olgeta sekta bilong PNG soisai.

Long apim namba bilong ol komyuniti bes ogenaísesen long wok gut insait long ol komyuniti bilong ol long daunim ol rot bilong ol meri long kisim HIV long dring bia na vailens egensim ol meri na ol liklik meri, dispela Smol Grent Program bilong Embeseada bai i helpim tu long daunim ol sik i bung wantaim olsem sevikel kensa na seksual trensmitet infesen.



Ol Sande skul na yut i pulap long namba 6 gutnius konprens long Boana Distrik.

Ol lida bilong bihain taimi gat sans bilong laip taim



Ol pipel i winim Australia Awat.

MOA long 120 futja lida o ol lida bilong bihain taim bilong Papua Niugini i redi long gat sans long kisim skolasip bilong stadi long Australia long 2016.

Kaunsel bilong Edukesen Dvelopmen long Australia Hai Komisn, Suzanne Edgecombe, i amamas long tokaut olsem, 53 pesen ol i givim long ol meri, 53 pesen bilong ol pipel i wok na stap long ol provins na 7 pesen long ol pipel wantaim disabiliti.

Mis Edgecombe i tok olsem wanpela Australia Awat i makim planti yia bilong hat wok, sakrifais na komitmen.

'Edukesen i save givim planti sans. Em i save opim planti ol sans yumi gat. Em i save senisim laip.'

'PNG i nidim olgeta pipel husat i mas skul na stap in-

sait long dvelopmen bilong kantri. Long 2015, moa long 50 pesen bilong Australia Awat i bin go long ol meri, na olsem 10 pesen i go long ol pipel i stap wantaim disabiliti.'

'Australia Awat i givim sans long ol pipel i kisim skolasip na wok long soim lidasip long ol komyuniti bilong ol, ol ogenaísesen, o insait long politikel grup bilong ol. Mipela i laikim sapotim neks jeneresen bilong ol PNG lida,' Mis Edgecombe i tok.

Planti bilong ol pipel em i namba wan taim bilong ol long kisim Australia Awat na dispela bai sapotim ol long kam bek long PNG wantaim wanpela kwalifikesen na ol save ol i ken yusim long sapotim dvelopmen bilong PNG.

Fri edukesen i mekim tisa kisim hat taim

Philemon Tame i raitim

FRI edukesen polisi we gavman i karim aut em i gutpela bilong planti ol tarangu papa na mama long putim ol pikinini bilong ol long skul, tasol ol tisa i kisim hat taim bikos ol i enrolim planti pikinini long olgeta skul.

Ekting Het Tisa bilong Ekivaki Elementri Skul, Hohola long Pot

Mosbi, Gani Mabone, i tok ol i no gat inap spes insait long klasrum long wokabaut i go kam na skulim ol pikinini.

"Bipo, wanpela tisa i save skulim 30 sumatin inap 40, tasol taim fri edukesen i kamap, namba bilong sumatin i go antap moa.

"Dispela problem em i no kamap long ol elementri skul tasol, nogat. Em i kamap

long ol praimer skul inap long ol sekenderi skul.

"Ol bikpela infrastraksa sevis i kam mak long praimer level na i go antap, na long elementri i no gat wanpela sevis kamap," Mabone i tok.

Long wankain taim, Senia Tisa, Steven Eka, i tok gut bai long ol gret 2 sumatin husat bai go long gret 3 long lowa praimer.

Eka i tok tenkyu long

papamama bilong ol sumatin long lukautim ol gut na sapatim ol long pinisim tripela yia long Ekivaki.

"Neks yia, elementri nem bai senis i go long lowa praimer na lowa praimer bai senis i go long midol praimer na apa praimer bai stap olsem yet.

Tasol, stail bilong skulim ol pikinini ba no inap long senis," Eka i tok.



Ol gret 2 sumatin long Ekivaki Elementri Skul long Hohola i stap isi na harim gut tok bilong het tisa bilong ol long taim ol i mekim gutbai belo kaikai bilong ol. Ol sumatin hia bai go long gret 3 long neks yia, 2016.



Ol praimer tisa long Maunt Hagen i stap insait long wanpela woksop we ol woklain bilong PNG Read i go pas long en.

Litresi ret i go bikpela aninit long Read PNG projek

MAK bilong litresi long tupela provins long Papua Niugini i lukim bikpela senis insait long tripela yia. Dispela i kamap long nupela risal bilong READ PNG projek.

Aninit long Read PNG we World Bank i save lukautim, Dipatmen bilong Edukesen i karim aut projek we Global Patnasip bilong Edukesen (GPE) i fandim, dispela projek i lukim ol narapela kain senis long lowa gret level bilong rit long ol sumatin long praimer skul long Westen Hailans na Madang provins.

Ol risalt bilong Eli Gret Riting Asesmen (EGRA) bilong Read PNG i soim

olsem distribusen bilong ol riting buk na trening bilong ol tisa i kirapim gutpela pasin bilong rit na rait long moa olsem 25 pesen long 4 pesen long dispela ol provins.

Read PNG projek i givim riting na ol meteriel bilong trening nupela samting long 800, 000 sumatin long elementri na praimer skul long PNG, na tu trening bilong ol tisa na ol lainim risos bilong ol tisa.

'Dispela em i gutpela samting, na mipela i bilip long go het long bildim dispela ekspirians wantaim Dipatmen bilong Edukesen long wok bung long mekim gut kwaliti bi-

long edukesen long PNG,' World Bank Kantri Menesa bilong PNG, Stefanie Stallmeister i tok.

Long wankain taim, Menesa bilong Edukesen Global Prektis long Is Esia na Pasifik rijon bilong World Bank, Dokta Harry Patrinos i tok, 'Dispela i soim olsem moa long wanpela insait long 4-pela sumatin long PNG insait long ol bikpela skul i kisim luksave olsem gutpela ol rita, i soim olsem ol i kliia, na gutpela skul taim Read PNG i bin stat.'

Dokta Patrinos i tok olsem taim kwaliti bilong skul long PNG i kamap gut, bikpela level bilong rit, fluensi na kom-

priensen bai mekim gut long kwaliti bilong edukesen bilong kantri na go het long sapatim developmen bilong PNG.

Wantaim Read PNG projek bai i pas long Disemba 2015, World Bank i wok bung wantaim Dipatmen bilong Edukesen i holim wanpela tupela de woksop bilong ol edukesen stekholda i karim aut dispela projek.

Long dispela woksop ol i bai lukluk long ol wok i kamap pinis na ol wok i kamap gut, na toktok long ol rot i go het long luksave dispela projek i mekim gut long Nesanel Edukesen Plen bilong gavman bilong PNG.

Urimong gret 8 sumatin raun lukim Ramu NiCo

OL GRET 8 sumatin bilong Sen Mary's Urimong praimer skul long Sumgilbar LLG long Sumkar Distrik, Madang provins i bin lukluk raun bilong ol i go long Ramu NiCo (MCC) het opis las wik Fonde bihain long eksam bilong ol.

Ramu NiCo Kopret Opis i amamas long givim tok-tok i go long 46 sumatin na 5-pela tisa long go long opis bilong kampani long Madang taun.

Ol sumatin na tisa i sindaun gut na harim toktok, lukim piksa, na pawa poin prisentesen ol Kopret opis i soim ol insait long tupela awa.

Bihain lo prisentesen ol sumatin na tisa i askim klostu olsem 10-pela askim long save moa long wok bilong Ramu NiCo.

Ol i askim ol kwesten tu long ol sapat long helt, edukesen, na komyuniti developmen na kisim ol bekim.

Gret 8 klas tisa Nick Yabalam tok tenkyu i go long Ramu NiCo Limited long



Ol sumatin na tisa sanap fran long Ramu NiCo Madang het opis.

larim ol i kam raun namba tu taim na salim tok amamas i go pas long gutpela wok kampani i wokim insait long Provins.

"Mipela i amamas long gutpela wok Ramu NiCo i wokim long helpim developmen we i kamap insait long Raikos na Usinobundi distrik, na wok Ramu NiCo i wokim long helpim gavman long eria bilong edukesen, helt na rot na bris," Mista Yabalam i tok.

Em amamas tu long wok Ramu NiCo i wokim long givim awenes i go long lo man meri husait i stap ausait long projek eria olsem skul bilong ol.

Mista Yabalam tok tu olsem skul i amamas tru na bai lukluk moa long kamapim gutpela wok bung wantaim Ramu NiCo long ol yia i kam bihain.

Skul Bod Siaman Michael Gamuna i tok amamas long Ramu NiCo

na i makim maus bilong Dimer, Basken na Karkum ples we ol pikinini bilong ol i save go skul long Sen Mary's Urimong praimer skul.

Mista Gamuna i askim ol narapela skul long Madang long yusim Ramu NiCo long helpim ol sumatin long lainim sains na teknoloji insait long eria bilong maining developmen long helpim ol long skul gut long kisim gutpela

Wanpela Skulim Wanpela - Amamas De long Pot Mosbi

Frieda Kana na Lisa Vernon i raitim

LONG Sarere namba 7 de bilong dispela mun, ol pikinini long Koki na Wanigela i bin amamas long gat wanpela de we ol inap long lukim ol buk bilong rit, harim sampela stori na penim pes bilong ol long wanem kain stail ol i laikim.

Klostu handet (100) liklik pikinini na ol bikpela lain tu i bin kamap long dispela Sarere long eria bilong Buk bilong Pikinini long mekim kain kain samting bilong amamasim de bilong ol.

Dispela de em ol lain bilong Wanpela Skulim Wanpela i bin go pas long redim wantaim pat-

nasip bilong Buk bilong Pikinini.

Ol i bin gat taim bilong stori long ol pikinini, lainim sampela husat i laik kamap tisa long we bilong skulim ol narapela na tu ol i penim pes bilong ol pikinini.

Wanpela mama husat i bin kamap long dispela trening i bin amamas tru na i tok, "Mi lainim ol gutpela we bilong helpim pikinini meri bilong mi long lainim long rit," na narapela i tok, "Dispela bai helpim mi long sapatim na helpim ol laing long wok ples bilong mi."

Wanpela pikinini i tok, "Mi baim wanpela buk bilong liklik brata bilong mi. Em i namba wan buk bilong em."

Lisa Vernon, wanpela literesi speselis i lainim ol lain long

skulim ol narapela long rit.

Em tu i stori long ol pikinini.

Em i tok Wanpela skulim Wanpela em i program bilong ol bikpela lain long ol komyuniti.

"Sapos yu inap long rit, yu ken kam insait na lain long trenim ol narapela olsem ol wantok bilong yu long hap yu stap o long sios bilong yu, setelmen o ples."

Ol i save trenim ol gras rut lain wantaim tok ples we ol i save soim ol isi we bilong lainim narapela.

Bai i gat narapela taim gen long holim kain amamas de olsem long 21 Novemba long makim Intenesenel De bilong ol Pikinini.

Stretim gut jastis bilong ol pikinini long PNG

OL polis na ol ligel profesenel long Papua Niugini bai redi gut long mekim wok painim aut na kalabusim ol krait i kamap long ol pikinini bihain long wanpela 'Pikinini Witnes Woksop' i kamap long Pot Mosbi long las wik.

Dispela em wanpela tingting bilong Opis Pablik

Prosekyuta (OPP) na Royel Papua Niugini Konstabluri (RPNGC), we woksop i lukim 22 Australia na ol PNG polis opisa na prosekyuta i wok bung long strongim wok painim aut, intaviu na save bilong glasim gut.

Taim Lukautim Pikinini Ekt i kamap long 2014, i bin gat bikipela luksave olsem ol witnes i no gat strong olsem ol

pikinini i nidim spesel lukaut na tingting gut taim ol i givim ol evidens bilong ol long polis na kot.

Dispela woksop i gat trening kot we ol prosekyuta i lainim long glasim gut na glasim gen ol witnes i nogat strong long strongpela na gutpela we. Ol narapela sesen em ol medikol evidens long ol pikinini seksuel hevi,

developmen bilong pikinini na daunim troma long ol intaviu.

Long opim woksop, Kaunsela Michael Sloane bilong Australia Hai Komisn i bin tok tenkyu long Kwinslan Polis Sevis na Kwinslan Opis bilong Dairekta bilong ol Pablik Prosekusen long sapatim OPP na RPNGC, na givim taim na save bilong ol long

namba tu yia.

Long wankain taim, Pablik Solisita, Jima Wala Tamate, i tok olsem dispela kain woksop em i wanpela bikipela samting na em i tok tenkyu long gavman bilong Australia long bildim strong bilong ol polis na ol loya.

'Pikinini i mas gat strong long givim evidens, sampela taim egensim eksen bilong ol

papamama. Dispela em ol rot we mipela i ken painim long toktok long kain ol kes na ol evidens long kot,' Mista Tamate i tok.

Em i salensim ol loya na ol polis opisa i stap insait long dispela woksop long wok wantaim olsem wanpela tim long karim aut gutpela prektis long ol jastis sevis.

'Long kriminel kes,

yumi mas givim gut evidens na sapos yumi no gat, bai yumi no inap kamapim jastis long ol viktim bilong krait,' Mista Tamate i tok.

Pakan Gabe, wanpela polis opisa i tok ol i lainim planti nupela samting long woksop we bai i helpim ol long wok na bai ol i serim wantaim ol wan wok bilong ol.

EVERY HERO NEEDS A MAMA FLAME

Mothers know it all starts with a full stomach.
That's what gives their families the Strength & Energy to win.

Flame
STRENGTH & ENERGY

Flame
Plain Flour
Strength & Energy 1kg



Ol pipel i bin stap insait long dispela woksop.



Konstelbel Shirlyanne Pius bilong RPNGC long woksop.



Piksa long tingting bilong atis long ol nupela klasrum bilong Lae Skul ov Nensing bai luk olsem.

Australia helpim ANGAU Haus sik long senisim Skul ov Nensing

ANGAU Haus sik i opim ol tenda bilong Lae Skul ov Nensing apgret na refebismen wok i op long Tunde dispela wik, na wok long stretim ol haus bilong nensing skul bai kirap long stat bilong yia 2016.

Australia gavman i putim AUD \$12 milien (klostu PGK 24 milien) long kamapim gut Lae Skul bilong Nensing

olsem wanpela hap bilong senisim ANGAU haus sik long Lae.

Ol senis bai helpim Lae Skul bilong Nensing long kisim moa nes sumatin long kamapim moa greduet bilong go wok insait long ANGAU haus sik. Nupela wok bai i gat wanpela nupela akademik haus bilong holim laibreri, konprens na prek-

tikal demonstresen spes, edministresen rum na haus kuk na ol hap bilong kaikai, na tu ol bai stretim olpela klasrum nau i stap.

Ol akitek o man bilong makim haus i wokim masta plen na disain wok bilong LSN em ol konsalten wantaim ol patna na stekholda olsem UNITECH na Morobe Provinsal Gavman.

"Nupela haus bai saptim karikalam bilong nensing na midwifery," Ekting Australia Hai Komisina, James Hall i tok.

Lae Skul ov Nensing Prinsipel Manase Moya i tok em i lukim olsem namba bilong ol sumatin long olgeta hap bilong Morobe Provins i wok long aplai long kam insait long skul.

Wol De bilong ol Toilet

SEKETERI Jeneral bilong Yunaitet Nesens (UN), Ban Ki-Moon i tok long dispela wik olsem senitesen em i namba wan long gupela helti environmen na helti bilong wan wan man na meri, developmen na gupela nem bilong ol man long graun.

"Tude em i de we Yunaitet Nesens i makim long wol bai luksave long bikipela wok bilong ol toilet na senitesen long laip bilong ol pipel. Tasol nau long olgeta hap long wol, namel long tripela pipel, wanpela bilong ol bai i no gat gupela toilet na ples bilong wasim han, na wanpela namel long 8-pela lain bai save pekpek na pispis long ples klia, we i no gat gupela toilet.

Wanpela 2030 asenda we ol UN i bin tok orait long kisim long kamapim Sastenebol Developmen i luksave long namba wan wok bilong senitesen. Dispela wok bilong bungim wantaim nupela asenda i minim olsem yumi mas klia gut long ol wok bung bilong ol samting i save kamapim developmen. Wantaim dispela tingting, long dispela yia, luksave bilong Wol Toilet De em lukluk long wanem kain rot malnutrisen i save kamap long taim i no gat gupela senitesen bilong ol pipel.

Senitesen na hajjin nogut em as bilong ol sik bilong lewa na malnutrisen. Sapos senitesen na hajjin i no gupela em isi long ol pikinini na bikipela man na meri i kisim ol dispela sik.

Long wan wan yia we senitesen i no gupela i save sotim laip bilong ol, pikinini i aninit long 5-pela krismas o i save senisim laip bilong olgeta, bikos long ol kain sik we i save kamap long dispela hevi.

Na moa long 800,000 pikinini long wol o wanpela long olgeta wanpela o tu-

pela minit i wok long dai wantaim sik pekpek wara na klostu hap namba bilong ol pikinini i dai husat i gat krismas aninit long 5-pela krismas i save dai bikos ol i no gat gupela nutrisen.

Wanpela hap bilong ol pikinini i no save gro go bikipela o longpela na planti narapela pikinini wantaim ol bikipela lain tu i save kisim bikipela sik na sampela i save kisim bikipela bagarap long laip taim bilong ol.

Ol papamama na ol waspapa na wasmama i save karim bikipela hevi bilong mani na taim long taim dispela kain hevi i save kamap. Ol meri o mama i save bikipela moa hevi long dispela ol sik tu.

Seketeri Jeneral i tok, maski bikipela toktok i stap long long dispela hevi, wok bilong daunim dispela hevi na kamapim gut senitesen long wol em i wok long kamap isi, isi tumas.

Em i tok olsem taim ol gavman i save mekim plen bilong mani, em ol i save abrusim senitesen planti taim, tasol senitesen em i wanpela bikipela samting insait long Milenium Developmen Gol.

Long dispela as ol i putim singaut i go long pablik i mas mekim samting long kamapim tingting bilong gupela senitesen we ol i bin autim long yia 2013 na bilong wanem as mipela i laikim olgeta lain i mas stop long pekpek natting long ples klia nau long yia 2015.

Dispela 2030 asenda i singaut long mipela i mas strongim gen wok bilong bringim gupela senitesen long olgeta hap bilong wol. Yumi mas givim skul na banisim ol komyuniti we i stap op tasol na isi long kisim bikipela sik long ol senitesen i no gupela na senisim tingting, bilip na pasin kalsa we i save bagarapim gupela sindaun.

O'Neill i tok Yunaitet Pati i stap ki koalisen patna bilong gavman yet

PRAIM Minista Peter O'Neill i tok, Yunaitet Pati bilong Minista bilong Foren Afeas, Rimbink Pato, i stap namba wan koalisen patna bilong gavman.

Em i bin mekim dispela toktok long fan resing kaikai bilong Yunaitet Pati long Pot Mosbi long las wik Fonde.

"Mi amamas long stap long hia bikos Yunaitet Pati i no gat inap namba, tasol em i ki patna bilong koalisen gavman," O'Neill i tok.

"Mi no tok long namba bilong Pati, tasol mi toktok long bikipela kontribusen na mi tok tenkyu long lida bilong Yunaitet Pati, Rimbink Pato, husat i mekim gupela wok long developim kantri bilong yumi."

Em i tok, long taim ol i kempen long kamapim O'Neill-Dion gavman long yia 2012, i no gat wanpela tingting nogut i stap olsem Yunaitet Pati bai mekim wanpela bikipela wok long gavman.

"Taim mipela i skelim ol ministri, planti bilong ol politisen i ken skelim wantaim ol Pati husat i gat bikipela namba, tasol mi no mekim olsem, nogat.

"I gat sampela taim gavman i save makim ol Minista aninit long stretpela rot na pasin i tru, na long dispela risen, Yunaitet Pati i no gat inap namba tasol em i kisim dispela ministri.

"Nau mipela i amamas bikos mipela i gat strongpela Minista bilong Foren Afea, husat i makim maus bilong kantri na i mekim planti wok wantaim ol narapela kantri," Praim Minista O'Neill i tok.

O'Neill i tok moa olsem, lida bilong Yunaitet Pati, Rimbink Pato, i promotim kantri bilong yumi olsem em i ken mekim wok long ilektoret bilong em.

"Wantaim sapot bilong Yunaitet6 Pati na ol narapela koalisen patna, gavman i givim fri edukesen we planti pipel i ting olsem dispela em gavman i trik na i mekim ileksen kempen," O'Neill i tok.

"Mipela i putim ekstra 1.2 milien pikinini i go long skul bihain long 4-pela yia olsem



Praim Minista Peter O'Neill i toktok long taim bilong fan resing kaikai bilong Yunaitet Pati long las wik Fonde.



Praim Minista Peter O'Neill, Lida bilong Yunaitet Pati na Minista bilong Foren Afea, Rimbink Pato, na ol narapela memba wantaim i sindaun bung long wanpela tebol long fan resing kaikai bilong Yunaitet Pati long Pot Mosbi. Poto i kam long opis bilong Praim Minista

gavman i lukluk long eduketim ol pikinini, bikos ol bai no inap go long wanpela hap sapos ol i no skul.

O'Neill i tok tenkyu tu long ol sapota bilong Yunaitet Pati long stap wantaim long fan resing kaikai.

"Sapos yupela i no givim sapot, ol pati bai no inap long kisim strong ol yet long olgeta hap long kantri. Pati i gat ol gupela polisi, tasol yupela i no putim han bilong yupela i go antap na sapot, em bai no inap long kamap olsem.

"Mi stap Presiden bilong

Pipel's Nesenel Kongres (PNC) pati long yia 1997 inap mi kamap Lida bilong dispela pati long yia 2002 inap nau, na long ranim politikel pati em i no isipela rot bikos planti taim yu bai putim han i go insait long poket, tasol em tu i no isipela rot," Praim Minista i tok.

Em i tok moa olsem "Nau gavman i kamapim planti lo we em i no bin kamap long palamen long histori bilong dispela kantri bipo, na nau gavman i strong tumas, bikos mipela i wok bung wantaim

na strongim i gavman."

Lida bilong Yunaitet Pati na Minista bilong Foren Afea, Rimbink Pato, i tokim ol sapota olsem, "Gavman bilong Praim Minista Peter O'Neill i strong na i orait long mipela bai go het long givim bikipela infrastraksa projek na ol program olsem gavman i promis."

"Pati bilong mi i bilip long lidasip bilong Praim Minista Peter O'Neill na em bai stap patna yet long gavman," Pato i tok.



STORI TASOL
wantaim
Fr Paul Liwun

BAIM GOD

LIKLIK boi i holim K1.00 long han bilong em i go i kam long planti stua. Olgeta stua em i go long em, em i askim stua kipa: "Yupela salim God tu a?"

Olgeta stua kipa i rausim em, bikos ol i ting dispela liklik mangki bai wokim trabel tasol.

Taim san i go daun em i go yet long wanpela stua. Em i go long stua namba 29 em laspela stua i stap long arere long olgeta stua.

Taim em i go insait, wanpela lapun man krismas bilong em i olsem 60, i soim gutpela welkam bilong em long liklik mangki. Lapun man i askim: "Wanem nem bilong yu? Bilong wanem yu laik baim God? Tokim mi plis!"

Mangki i tokim em: "Nem bilong mi BONDI. Taim mi liklik bebi yet, papa na mama indai. Ankel bilong mi i bin lukautim mi inap tude. Ankel i wok long wanpela projek. Sampela de i go pinis, em i bin pundaun antap long plua namba tri i go daun long graun. Ol i bringim em i go long haus sik. Nau em i stap long koma.

Dokta i bin traim bes bilong em tasol em i tok em i no inap nau. i nogat hop moa. God tasol bai inap long mekim ankel bilong mi kamap orait gen".

Wantaim ai wara i pundaun, mangki i go het: "Mi save olsem God em i wanpela gutpela marasin stret. Olsem na mi bin painim long olgeta stua. Mi laik baim God long helpim uakel bilong mi".

Taim lapun man i harim stori bilong Bondi, aiwara bilong em tu i pundaun olsem bikpela wara tru. Em i tokim Bondi olsem: "Pikinini! Long hia i gat God. Na prais bilong em K1 tasol, stret long mani bilong yu."

Lapun man i kisim wanpela botol i gat drink long kap bod i gat raiting olsem: LAIKIM BILONG GOD. Em i tokim Bondi: "Kisim dispela marasin. Bringim na givim long ankel bilong yu. Bihain long dringim dispela marasin, em bai kamap orait gen".

Bondi i tok tenkyu na em i kisim botol marasin na ran i go bek long haus sik. Taim em i kamap, em i singaut bikpela tru: "Ankel....,ankel. Mi baim God pinis. Bihain long dringim God, ankel bai kamap orait gen".

Sampela de bihain, wanpela tim bilong dokta i kam long haus sik wantaim ol nupela masin bilong ol long wokim spesel wok long lukautim ankel bilong Bondi. Sampela wik bihain ankel bilong Bondi i kamap orait.

Taim em i laik lusim haus sik, em i lukim bil bilong em i antap tru. Milien Kina. Em i klostu pundaun. Hariap tasol, wokman bilong haus sik i tokim em: "Yu noken wari. Wanpela lapun man i bin baim bil bilong yu. Em i wanpela bikpela bos bilong wanpela bikpela kampani. Taim em i ritaia, em i baim wanpela stua klostu long hia na wokim liklik bisnis bilong em. Em tasol i bin singautim dispela tim dokta na em baim ol pinis".

Bihain long harim stori, Bondi wantaim ankel bilong em i hariap tru i go long dispela stua. Manmeri i tokim ol olsem, em tru, wanpela lapun man i bin opim stua long hia. Tasol nau em i salim stua bilong em pinis na go limlimbur ovasis.

Sampela mun bihain, ankel bilong Bondi i kisim wanpela pas i kam long dispela lapun man. Em i rait: "Hai yangpela! Yu laki tru i gat wanpela ankel bilong yu, Bondi.

Wantaim K1 long han bilong em, em go long olgeta stua long baim GOD long helpim yu.

Em tasol i mekim yu i kamap orait gen. Tasol yum as tingim gut: **'GOD i SAVE STAP INSAIT LONBG BEL BILONG MANMERI i GAT LAIK PASIN'**.

Taim bilong senis: Paitim bai i no inap kamapim senis

DE Novemba 25 i makim Intenesenel De bilong Pinisim tru Vailens Egens Wimen, na 1-Tok Kaunselin Helpim Lain i toktok strong yet long senis i mas kamap insait long Papua Niugini.

Minista bilong Sios, Yut na Komyuniti Dvelopmen, Hon. Delilah Gore, i mekim luksave long wok we 1-Tok Kaunselin Helpim Lain sevis i kamapim pinis long daunim pasin bilong famili na seksuel vailens, makim Papua Niugini gavman. Misis Gore i tokaut olsem em i sapotim tingting bilong kamapim wanpela frikol telepon lain.

"Olsem Minista bilong Sios, Yut na Komyuniti Dvelopmen, mi bilip olsem dispela hotlain em i wanpela gutpela rot i kamap long helpim pait bilong daunim famili na seksuel vailens," Misis Gore i tok.

"Senis em i bin kamap pinis bihain long lons bilong en long Ogas 20 em i soim olsem i gat bikpela nid long helpim ol man, meri na ol pikinini husat i kisim hevi na trabel," em i tok.

Na wanpela gutpela stori moa bilong senis i kamap em long rot we ges spika long dispela taim, Taina Gebai, i bin bihainim long kamap gutpela man. Mista Gebai i bin wanpela strongpela man bilong pait bipo tasol nau wantaim dispela sevis i senisim ol



Papa bilong 7-pela pikinini, Taina Gebai, i sanap kisim poto wantaim pikinini meri Margaret, i lainim ol meri na man wokabaut wantaim na stap wantaim wanbel pasin na bel isi.

pasin bilong em. Nau em i stap olsem wanpela sios lida na siaman bilong kaunsel bilong ol sif long Pari viles. Mista Gebai i bin wanpela man bilong dring bia, spak na kamapim pait long yangpela taim bilong em na em i save paitim ol pikinini bilong em.

"Mi bin stap olsem wanpela rabis man i no gat gutpela tingting bipo. Mi no save rispekim wanpela man. Em i laipstail bilong mi na dring bia i mekim i go nogut olgeta," em iEm i tok hevi i go bikpela long laip bilong em na ol pikinini bi-

long em i save pret long em. Tasol meri bilong em i save pre long em inap wanpela taim ol polis i kisim em i go long polis stesen. Dispela taim ai bilong em i op long lukim wanem kain hevi em i statim na nau tingting bilong em i stat long senis. Taina i kisim helpim long ol lain long sios na long komyuniti bilong em long tanim bek na senisim laip bilong em.

Taina i ting olsem em i gutpela long ol pipel long tupela sait bilong rilesensip i mas yusim fri kaunseling sevis

long kisim helpim ol i nidim na ol i mas stopim vailens long haus lain bilong ol.

"Bikpela samting em long kamapim gutpela komyuniti we ol man, meri na pikinini stap wantaim bel isi na wanbel pasin," Taina i tok.

Dispela sevis, 1-Tok Kaunselin Helpim Lain em i wok patnasip namel long ChildFund Papua Niugini, CIMC (FSVAC) na FHI 360, wantaim fanding sapot bilong Nu Silan Eid Program, USAID, ChildFund Nu Silan na ChildFund Australia.

Yunaitet Sios Evanjelisem Konvensen

Frieda Sila Kana i raitim

YUNAITET Sios bilong PNG i bin holim wanpela wik Enuel Evanjelis Konvensen long Emmaus Konprens senta bilong Don Bosco Teknikal Institut long Pot Mosbi long stat bilong dispela mun.

Het toktok bilong dispela konprens em, 'Telimautim Gutnius wantaim Holi Spirit - Em i Bikpela Singaut'.

Olpela Modereta bilong Yunaitet Sios, Reveren Sir, Samson Lowa i bin kamap wanpela tisa long dispela taim wantaim wantaim nau Modereta bilong sios, Rev. Bernard Siai i bin stap long dispela taim.

Konvensen i bin stat long Sande Novemba 1 na i pinis long Fraide Novemba 8. Long pinis bilong konvensen, Asembli Seketeri bilong Yunaitet Sios, Uvenama Rova i bin ritim gutnius long gospel bilong Matyu sapta 17: 1-13 we i stori long Jisas i senisim bodi antap long maunten.

Reveren Itolo Arua, Asembli Kodineta husat i bin go pas long kodinetim olgeta wok bilong konvensen, i bin makim toktok bilong wanpela Ritaia



Reveren Itolo Arua (holim bikpela kendel) i laitim namba wan kendel bilong wanpela rijon. Bihain em i laitim olgeta 11-pela kendel.

Reveren, long "Wokabaut insait long spirit" long strongim het toktok bilong dispela konvensen. Em i makim tu toktok bilong pastaim modereta, Rev. Sir Samson long Tok bilong God o 10-pela LI.

"Dispela rit long stori bilong Matyu long mauten em i bilong tripela disaipel i bin stap na lukim dispela samting i kamap we Jisas i senis na kamap narakin na ol i harim nek bilong God i tokaut long Jisas em i husat.

"Dispela em i soim olsem Jisas em i trupela pikinini man bilong Bikpela God antap. Tok

bilong God i save stap oltaim, oltaim. Transfiguresen o Senis i kamap long Jisas long maunten em i tokaut long kingdom bilong God we bai i kam. Na yumi olsem ol evanjelis i mas lain long harim tru nek bilong Bikpela," Rev Itolo i tok.

"Yumi lukim olsem bihain long senis i kamap antap long maunten, ol 9-pela disaipel i stap long daunbilo i lusim tingting long wokim evanjelisem. Wok bilong karim gutnius em bai kamap strong taim yumi lusim kaikai na pre. Yumi mas brukim bel long ai bilong God. Dispela wik em

yumi bin go antap long maunten tasol bihain long dispela em bai yumi go daun bek na lukim olsem yumi gat bikpela nid i stap.

"Yumi gat tabenakel i stap insait long yumi. Yumi karim glori bilong God insait long yumi we yumi mas givim i go long ol narapela tu," Reveren Itolo i tok.

Bilong pinisim konvensen, Modereta Bernard Siai i bin singautim 11-pela evanjelis i makim ol wan wan bilong ol 11-pela rijon i go antap long fran na holim wan wan kendel we ol i laitim long wantaim paia long bikpela kendel we Asembli Kodineta, Reveren Itolo Arua i bin holim. Dispela i soim pawa bilong gutnius bilong Jisas Krai. Lait bilong kendel bai soim rot bilong ol evanjelis i go long wol.

Ol i bin brukim bret tu long dispela taim wantaim ol wokman na meri bilong Asembli opis na sampela lain bilong George Brown Sios long Gerehu husat i bin kamap long singsing kwaia long pasim konvensen.

Narapela konvensen bihain long dispela bai kamap long Bogenvil Rijon.



LAE SCHOOL OF NURSING



Piksa long tingting bilong atis long ol nupela klasrum bilong Lae Skul ov Nensing bai luk olsem.

Australia helpim ANGAU Haus sik long senisim Skul ov Nensing

ANGAU Haus sik i opim ol tenda bilong Lae Skul ov Nensing apgret na refebismen wok i op long Tunde dispela wik, na wok long stretim ol haus bilong nensing skul bai kirap long stat bilong yia 2016.

Australia gavman i putim AUD \$12 milien (klostu PGK 24 milien) long kamapim gut Lae Skul bilong Nensing

olsem wanpela hap bilong senisim ANGAU haus sik long Lae.

Ol senis bai helpim Lae Skul bilong Nensing long kisim moa nes sumatin long kamapim moa greduet bilong go wok insait long ANGAU haus sik. Nupela wok bai i gat wanpela nupela akademik haus bilong holim laibreri, konprens na prek-

tikal demonstresen spes, edministresen rum na haus kuk na ol hap bilong kaikai, na tu ol bai stretim olpela klasrum nau i stap.

Ol akitek o man bilong makim haus i wokim masta plen na disain wok bilong LSN em ol konsalten wantaim ol patna na stekholda olsem UNITECH na Morobe Provinsal Gavman.

"Nupela haus bai sapotim karikalam bilong nensing na midwifery," Ekting Australia Hai Komisina, James Hall i tok.

Lae Skul ov Nensing Prinsipel Manase Moya i tok em i lukim olsem namba bilong ol sumatin long olgeta hap bilong Morobe Provins i wok long aplai long kam insait long skul.

Wol De bilong ol Toilet

SEKETERI Jeneral bilong Yunaitet Nesens (UN), Ban Ki-Moon i tok long dispela wik olsem senitesen em i namba wan long laip bilong ol pipel na gutpela helti environmen na helt bilong wan wan man na meri, developmen na gutpela nem bilong ol man long graun.

"Tude em i de we Yunaitet Nesens i makim long wol bai luksave long bikpela wok bilong ol toilet na senitesen long laip bilong ol pipel. Tasol nau long olgeta hap long wol, namel long tripela pipel, wanpela bilong ol bai i no gat gutpela toilet na ples bilong wasim han, na wanpela namel long 8-pela lain bai save pekpek na pispis long ples klia, we i no gat gutpela toilet.

Wanpela 2030 asenda we ol UN i bin tok orait long kisim long kamapim Sastenebol Developmen i luksave long namba wan wok bilong senitesen. Dispela wok bilong bungim wantaim nupela asenda i minim olsem yumi mas klia gut long ol wok bung bilong ol samting i save kamapim developmen. Wantaim dispela tingting, long dispela yia, luksave bilong Wol Toilet De em lukluk long wanem kain rot malnutrisen i save kamap long taim i no gat gutpela senitesen bilong ol pipel.

Senitesen na hajjin nogut em as bilong ol sik bilong lewa na malnutrisen. Sapos senitesen na hajjin i no gutpela em isi long ol pikinini na bikpela man na meri i kisim ol dispela sik.

Long wan wan yia we senitesen i no gutpela i save sotim laip bilong ol, pikinini i aninit long 5-pela krismas o i save senisim laip bilong olgeta, bikos long ol kain sik we i save kamap long dispela hevi.

Na moa long 800,000 pikinini long wol o wanpela long olgeta wanpela o tu-

pela minit i wok long dai wantaim sik pekpek wara na klostu hap namba bilong ol pikinini i dai husat i gat krismas aninit long 5-pela krismas i save dai bikos ol i no gat gutpela nutrisen.

Wanpela hap bilong ol pikinini i no save gro go bikpela o longpela na planti narapela pikinini wantaim ol bikpela lain tu i save kisim bikpela sik na sampela i save kisim bikpela bagarap long laip taim bilong ol.

Ol papamama na ol waspapa na wasmama i save karim bikpela hevi bilong mani na taim long taim dispela kain hevi i save kamap. Ol meri o mama i save bikpela moa hevi long dispela ol sik tu.

Seketeri Jeneral i tok, maski bikpela toktok i stap long long dispela hevi, wok bilong daunim dispela hevi na kamapim gut senitesen long wol em i wok long kamap isi, isi tumas.

Em i tok olsem taim ol gavman i save mekim plen bilong mani, em ol i save abrusim senitesen planti taim, tasol senitesen em i wanpela bikpela samting insait long Milenium Developmen Gol.

Long dispela as ol i putim singaut i go long pablik i mas mekim samting long kamapim tingting bilong gutpela senitesen we ol i bin autim long yia 2013 na bilong wanem as mipela i laikim olgeta lain i mas stop long pekpek nating long ples klia nau long yia 2015.

Dispela 2030 asenda i singaut long mipela i mas strongim gen wok bilong bringim gutpela senitesen long olgeta hap bilong wol. Yumi mas givim skul na banisim ol komyuniti we i stap op tasol na isi long kisim bikpela sik long ol senitesen i no gutpela na senisim tingting, bilip na pasin kalsa we i save bagarapim gutpela sindaun.

O'Neill i tok Yunaitet Pati i stap ki koalisen patna bilong gavman yet

PRAIM Minista Peter O'Neill i tok, Yunaitet Pati bilong Minista bilong Foren Afeas, Rimbink Pato, i stap namba wan koalisen patna bilong gavman.

Em i bin mekim dispela toktok long fan resing kaikai bilong Yunaitet Pati long Pot Mosbi long las wik Fonde.

"Mi amamas long stap long hia bikos Yunaitet Pati i no gat inap namba, tasol em i ki patna bilong koalisen gavman," O'Neill i tok.

"Mi no tok long namba bilong Pati, tasol mi toktok long bikpela kontribusen na mi tok tenkyu long lida bilong Yunaitet Pati, Rimbink Pato, husat i mekim gutpela wok long developim kantri bilong yumi."

Em i tok, long taim ol i kempen long kamapim O'Neill-Dion gavman long yia 2012, i no gat wanpela tingting nogut i stap olsem Yunaitet Pati bai mekim wanpela bikpela wok long gavman.

"Taim mipela i skelim ol ministri, planti bilong ol politisen i ken skelim wantaim ol Pati husat i gat bikpela namba, tasol mi no mekim olsem, nogat.

"I gat sampela taim gavman i save makim ol Minista aninit long stretpela rot na pasin i tru, na long dispela risen, Yunaitet Pati i no gat inap namba tasol em i kisim dispela ministri.

"Nau mipela i amamas bikos mipela i gat strongpela Minista bilong Foren Afea, husat i makim maus bilong kantri na i mekim planti wok wantaim ol narapela kantri," Praim Minista O'Neill i tok.

O'Neill i tok moa olsem, lida bilong Yunaitet Pati, Rimbink Pato, i promotim kantri bilong yumi olsem em i ken mekim wok long ilektoret bilong em.

"Wantaim sapot bilong Yunaitet6 Pati na ol narapela koalisen patna, gavman i givim fri edukesen we planti pipel i ting olsem dispela em gavman i trik na i mekim ileksen kempen," O'Neill i tok.

"Mipela i putim ekstra 1.2 milien pikinini i go long skul bihain long 4-pela yia olsem



Prait Minista Peter O'Neill i toktok long taim bilong fan resing kaikai bilong Yunaitet Pati long las wik Fonde.



Prait Minista Peter O'Neill, Lida bilong Yunaitet Pati na Minista bilong Foren Afea, Rimbink Pato, na ol narapela memba wantaim i sindaun bung long wanpela tebol long fan resing kaikai bilong Yunaitet Pati long Pot Mosbi. Poto i kam long opis bilong Prait Minista

gavman i lukluk long eduketim ol pikinini, bikos ol bai no inap go long wanpela hap sapos ol i no skul.

O'Neill i tok tenkyu tu long ol sapota bilong Yunaitet Pati long stap wantaim long fan resing kaikai.

"Sapos yupela i no givim sapot, ol pati bai no inap long kisim strong ol yet long olgeta hap long kantri. Pati i gat ol gutpela polisi, tasol yupela i no putim han bilong yupela i go antap na sapot, em bai no inap long kamap olsem.

"Mi stap Presiden bilong

Pipel's Nesenel Kongres (PNC) pati long yia 1997 inap mi kamap Lida bilong dispela pati long yia 2002 inap nau, na long ranim politikel pati em i no isipela rot bikos planti taim yu bai putim han i go insait long poket, tasol em tu i no isipela rot," Praim Minista i tok.


Em i tok moa olsem "Nau gavman i kamapim planti lo we em i no bin kamap long palamen long histori bilong dispela kantri bipo, na nau gavman i strong tumas, bikos mipela i wok bung wantaim

na strongim i gavman."

Lida bilong Yunaitet Pati na Minista bilong Foren Afea, Rimbink Pato, i tokim ol sapota olsem, "Gavman bilong Prait Minista Peter O'Neill i strong na i orait long mipela bai go het long givim bikpela infrastraksa projek na ol program olsem gavman i promis."

"Pati bilong mi i bilip long lidasip bilong Prait Minista Peter O'Neill na em bai stap patna yet long gavman," Pato i tok.

Em nau! Ol pikinini i ken painim rot i go long ples wantaim Wantok kru...



Bai yumi no inap dai moa

Maunten paia long Manam na wesana i pundaun long olgeta hap. Planti tru i pundaun tu long gras kantri long Angoram distrik.

Olgeta sak sak kanu i pulap long wesana. Moning tru ol meri long ples ol i bung na stori long wanem samting i kamap.

Taim Kanage i harim olsem em i tokim meri bilong em. Em nau ples nogut bilong ol sin man i paia pinis long hel. Nau yumi lukim das bilong ol bun bilong ol i kam long yumi.

Dai man i pundaun kam daun na wasim yumi. Bai yumi no inap dai moa na tu bai nogat las de moa. Bai yumi stap long ples long de taim tasol na wetim ol man i dai bipo bai tromoi tin pis na rais kamdaun long yumi olsem dispela wesana i pundaun nau ya.

Taim ol meri harim ol kon stori bilong em, ol i kalap kalap na paitim han na ol i singaut, "Hepi gut de Kanage. Wis yu ol the bes. Lip fo eva mo. Hel i pinis na heven i kamap."

Carl Lenua
Samban base

Posin man

Kanage i mekim haus bilong em long maunten ol i kolim 'Mosou De Tohu Via.'

Na em i gat tupela rum. Wanpela bilong sindaun na skelim ol meri i go na narapela em bilong slip.

Wanpela taim long bik nait stret, Kanage i pilim hot na i laik go kisim kol win long nambis. Em i kirap katim i go daun long solwara na em i lukim wanpela man i toilet i stap na em i katim long sait i go.

Long ples i bin gat tok win olsem ol posin man i save raun long bik bus long biknait.

Taim man i lukim Kanage, em i ting olsem em i posin man na em i singaut antap stret. Kanage i harim man i singaut na em tu i ting olsem em i wanpela posin man. Man, Kanage i no isi long ran. Em i ran siksti na go hait long haus lotu.



Kanage nau i tingim olsem man i wok long toilet i stap. Em i no save olsem man i go kisim ol man meri long painim dispela posin man na mekim save long en, Kanage tasol.

Taim em i lukim ol manmeri i kam long haus lotu em i save olsem ol i mas ting olsem em i posin man.

Hariap tru em i laitim ol kendel na sindaun i go daun long fom na giaman beten i stap. Taim ol i kam long haus lotu ol paul sapos em tasol o narapela man. Kanage i lukim ol na pret olsem nogut ol i paitim em.

Ol i tok olsem nogut posin man em i Kanage na em i kirap na tokim ol olsem, "Yupela luksave long man na toktok tu o nogat. Taim man i sindaun na beten i stap em i bikpela tambu tru long toktok o askim long wanpela samting"

Samting tru em i pret long ol i paitim em na em i giaman tokim ol olsem em i kam long haus lotu long beten.



Ol wod lista hia:

- ANIVESERI
- AIDIN
- ABRUSIM
- BAKLAIN
- BALUS
- BLAIN
- DOKTA
- FONDE
- GAVANA
- HANGAMAP
- HEVI
- KALAPA
- KISIM
- KRISTEN
- LAINIM
- LEPHEN
- MAKMAK
- MASIN
- MELEK
- PAINIMAUTIM
- PASPOT
- PASDRAI
- PLANTIHAN
- RABIS
- SAPIM

C S Y J Z E N Q Q B H D A F Q K S T K M
 N C E O N P H S N D P E D B E N O Q I M
 W I V E O A F O N D E K A L A P A T S O
 S O X T P S V X H G X W E M S L U I I T
 G S H C A E T T R T B M I A B A U O M O
 A A E R N Q Z E T Y H P P N M N D S S S
 K M T V Q K F N S A A K R I S T E N E E
 G P I A G S Y M N S N P N V M I F T J S
 T E L U N D P G A J G I A E I H T J N S
 A G F B S H R T E K A A M S E A Z H F Z
 H E T R N Q T G I P M U B E D N S D C H
 M Y A I D I N A N G A A U R N R M Q O D
 R E A N S O C J D A P A K I U D A C H L
 A L L I B L O T A V Q M A C E S S I C D
 B E G P F P A T S A I L S R S A I Y G R
 I A C N E M K M T N K G T A D P N M V B
 S F C I I O F Q I A A X I S M G U G A N
 L X K Y D Q G A B M S V F C A L N O A D
 M E R D Z M L E P H E N E N U J M X N S
 B S E R D D H F E H A S A M T V N T O M

Ansa bilong Wod Pilai isu 2148

Y P N C M E O F R M J A S H I U K E V L
 A S G R T E A T D O A U N T M M E S E F
 L S H E U F R B I N E M O T Z A U U R E
 S N O Y N O N M M V U N T E T K S D C A
 S U M C R V E I A A L N D A S I S H O D
 N L M U S D S I R M A U K U P L T J M E
 B R I X E M G G B A A M K U D B E C K D
 N B I Z O H L T M K N O A E E C E M B H
 S A J A D H H I U E W M V S I K W A L Y
 O T P L I O P A T T I N A M A W R L R H
 M G U S R L K E U T E B I I E L M A E T
 W O U E E S B G O S M D P S T I A X I E
 R O S H M D L B E E M A T O M G R X A I
 E N G B Q P A K H I K E P A N S I E P M
 J T I E A T I N D E S T R I S K T I E E
 K H G L K L P K B H E D M J I C S G M D
 L S T O P C S F V A T I C J S P E E E P
 S A D A A E T E E U M V Q P C R E N G M
 D O B F E Z O L O E R I P I Q D S S B N
 L P T O N P K I R A P I M E M O T H E A

Ol rait i kam wantaim risponsibiliti



ASDE Trinde 18 Novemba, i lukim stat bilong 20 de human rait ektivisim long luksave long ol kain kain rait ol manmeri bilong graun i gat long stap laip na amamas long graun. Long planti yia nau Papua Niugini i save selebretim ol dispela de bilong Human Rait na i luk olsem ol de long yia i wok long sot long makim wanpela kain de bilong luksave long kain kain hevi i stap we i save bagarapim sindaun bilong manmeri na pikinini.

Wanpela bikpela hap bilong Human Rait em Risponsibiliti o Wok we yumi wanwan manmeri na pikinini i mas mekim long inapim rait bilong yumi. Wanpela strongpela toktok nau i kamap em long rait bilong ol pikinini long kisim gut edukesen na go het long pinisim gut mak bilong gret 12 na go long yunivesiti o bikpela trening institusien.

Planti taim ol pikinini i no save skul gut bikos long planti kain samting olsem, tisa i no gat gutpela save long lainim ol o, ol i no gat gutpela sindaun long haus o ol narapela pikinini i bagarapim na daunim ol tumas, o narapela man i kamapim birua long ol. Narapela em i olsem gavman i no putim inap risos long ol inap long sindaun gut na lainim. Kain ol risos olsem klasrum, ples bilong slip o haus tisa o gutpela wara saplai long taim bilong san na yumi ken kolim ol kain nid i go yet. Bikpela hevi em yumi save putim long gav-

Ol pikinini i gat rait long go skul.. I no wok olsem leba..Em Child Labour



Jada 0151

man i mas luksave na kamapim moa fasiliti o ples bilong ol sumatin na tisa long lainim samting. Mani em i narapela ki samting we inap long opim dua o larim dua i pas i stap.

Tasol wanpela samting we yumi

no save toktok long en tumas em long Risponsibiliti o wok bilong wanwan manmeri na pikinini long lukautim ol rait bilong yumi. Wanpela risponsibiliti we ol pikinini na ol manmeri i gat em long givim taim long gutpela stadi long ol buk

pipel yet i no inap long banisim ol yet long ol kain piksa na tingting nogut we i givim tingting nogut.

PNG em i wanpela Kristen kantri na i gat Melanesia kalsa bilong bihainim gutpela pasin bilong

o long go long ol intanet websait we i gat ol toktok na piksa bilong edukesen i stap. Ol papamama i gat risponsibiliti long sindaun wantaim ol pikinini bilong ol na soim ol wanem kain websait long intanet em i gutpela long ol o wanem ol buk ol i mas ritim. Ol i gat wok long helpim ol long mekim ol skul wok bilong ol.

Nau bai gat wanpela lo bilong sekim na pasim ol websait we i karim ol piksa na toktok nogut we ol liklik pikinini na yangpela manmeri i no mas lukim na ritim. Ating dispela lo em i gutpela long wanem ol

harim tok na stap wanbel long komyuniti em i stap. Ol tumbuna bilong bipo i no save sindaun long skul na rit na rait tasol ol i save toktok tasol na soim pasin kalsa long ol yangpela. Laip long bipo i no bin gat planti bikhet tumas bikos i gat pasin bilong rispek i stap long ol bikpela lain na long oda bilong komyuniti we ol yangpela i save long long bihainim.

Bihain taim Kristen bilip i kam insait long kalsa bilong yumi, i gat Lo bilong God i kam wantaim pasin bilong bihainim Tok bilong God na stap aninit long ol papa na ol mama long ol elda long sios. Dispela i mekim orait.

Sampela hevi yumi lukim nau i kamap em i kamap long taim olgeta pikinini i lainim long skul olsem ol i gat rait long kain kain pasin na bilip na tingting. Bikos long dispela taim nau ol pikinini i gat strong long bekim maus bilong papamama, bikhet long tisa na wokim wanem samting ol i laik mekim.

Yumi painim kain kain we long stretim hevi bilong rispekim rait bilong wanpela narapela, tasol planti taim ol pipel na gavman i les long luksave olsem namba wan rait na risponsibiliti long man i bihainim em i stap long Tok bilong God

Long Buk Stat i go inap long buk Kamapim Tok Hait ansa bilong Human Rait em i stap. Yusim rait bilong go long skul na lainim rit na bai yu save long trupela rait bilong ol na painim gutpela sindaun bilong yu na bilong narapela tu.

Gutpela long pikinini pinisim 12-pela yia bilong skul

EDUKESAN sistem bilong Papua Niugini i no strong, planti samting i sot o i asua yet, planti manmeri long kantri i luksave long dispela.

Sapos em i autkam bes edukesen (OBE) o standet bes edukesen (SBE) wankain hevi i stap na dispela i tru.

Bikpela hevi ol manmeri i luksave em no gat komitmen.

Long dispela mipela i tok gavman na tisa i mas pas tru long wok bilong ol.

Long gavman em i mas givim inap sapot long sait bilong mani long trenim ol tisa, kamapim inap ol skul, sanapim ol klasrum na ol metiriel bilong ol pikinini i lain gut.

Long ol tisa ol i mas kisim gutpela trening na i mas givim inap taim na skulim gut ol pikinini long rit, rait na save long ol samting.

Dispela tupela bodi o wok i bikpela samting long pikinini i



lain gut.

Tasol long nau yet mipela i kisim dispela taim long tok amamas na sapotim tingting na wok Gavman i statim pinis long lukim ol pikinini kisim save bilong rit na rait.

Mipela i amamas olsem gavman i kamapim fri edukesen polisi, pikinini i no ken baim skul fi long go skul.

Skul o kisim save em i rait wankain olsem ol arapela humen rait we olgeta manmeri i mas gat long em.

Fri edukesen polisi i strongim dispela rait na

mipela i amamas long gavman long sapot bilong em.

Olsem nau gavman i kamapim fri edukesen polisi planti samting i sot o asua yet na dispela mipela i tokaut pinis long antap, Gavman i mas gat komitmen.

Nau mipela i harim olsem em i tok long pinisim sistem bilong ol eksam (exam) we taim pikinini i mekim gut long Gred 8 Eksam em i go long Gred 9 na taim em i mekim gut long Gred 10 Eksam em i go long Gred 12.

Dispela tingting i gutpela bikos em i givim inap taim long pikinini i lain gut.

Mipela i tok 12-pela yia i givim inap taim long pikinini i redim em yet long laip, maski em i go long yunivesiti, koles o nogat.

Givim inap yia long pikinini i no helpim em tasol long rit na rait tasol i helpim em long lainim praktikel skil, wok kapenta, mekanik, didiman,

samap na kuk na lainim pasin bilong arts na kalsa. Em i ken yusim dispela save long sapotim laip bilong em long bihain taim.

Long displea as mipela i sapotim tingting bilong gavman long lukim ol pikinini i pinisim olgeta 12-pela yia bilong skul.

Yes bai gat ol asua tasol bikpela samting em pikinini no go tasol long skul bikos em i polisi.

Nogat. Gavman i mas kamapim ol standet o mak namel long dispela ol yia long save sapos pikinini i lain gut o nogat.

Sapos ol i no lain gut pikinini i ken go long rimidiel o namel yia long em i lain gut na hapim mak bilong em.

O sapos nogat em i mas statim gen dispela Gred we em i no lainim gut ol samting.

Kain olsem mipela i ken save sapos pikinini i save o no gat.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Bikpela birua long Paris, Frans ...129 dai i bihain long teroris birua na kisim sampela kalabus

WOL i bungim gen bikpela hevi long ol teroris na nau i skelim long glasim ol rot long bihainim long stopim moa birua olsem bihain long 129 pipel i dai long kantri Frans long las wik Fraide.

President bilong Frans, Francois Hollande, i tok 129 i dai long las wik Fraide long 6-pela ples insait long Paris, bikpela siti na kapitel bilong Frans.

President Hollande i tok ol dispela birua em ol i plenim na tok sut i go long ISIS o ol Islamik Stet teroris grup long kamapim dispela birua i gat long en sutim dai, tromoim bom na kisim sampela pipel insait long wanpela konseset bildingolsem ol kalabus.

President Hollande i tok, 'taim pait i bungim kantri, em i mas wokim samting we teroria ami bilong DAESH (ISIS) i wokim long yumi, kantri we i fri na i save toktok wantaim ol narapela long dispela graun."

President i tokaut long tripela de bilong hauskra

long olgeta hap bilong kantri Frans.

Ol ripot i kamp long Agence France-Presse, we ol i kisim long polis i tok 8-pela teroris i dai pinis. Sevenpela long ol em ol i bin bihain long ol i presim baten long ol susait vest o ol sios ol i werim bikos ol i wokim long dispela kain wok.

Polis i tokim BBC olsem ol i painim wanpela paspot bilong man Syria namel long ol susait teroris.

Polis i bilip olsem olgeta teroris husat i karimaut dispela birua i dai pinis, tasol ol i wok long painim ol lain poroman i bin helpim ol long wokim dispels birua.

Ol i bin kisim samting olsem 300 pipel i go long haus sik. 80 pipel i stap long no gut mak bilong dai na 177 long i no gutpela kondisen, taim ol dokta i rausim pinis 53 pipel i go bek long ol haus bilong ol.

US Stet Dipatmen i sam-pela man Amerika i stap insait long ol lan i kisim

bagarap.

Gavman bilong Amerika nau i wok wantaim ol atoriti bilong Frans long painim na luksave long ol lain Amerika i kisim bagarap long dispela birua.

President Hollande bilong Frans i tok bihainim dispela birua, ol i strongim ol bodasekap na putim stet ov imejensi pinis nau, na husat man ol i lukim na painim em olsem birua ol bai putim em aninit long haus ares, mining olsem em bai no inap long larim em long lusim haus.

President Hollande i tok dispela kain birua em kantri frans i no save lukim bipo na President Barack Obama bilong Amerika i tok dispela kain birua em i egensim humaniti o pipel long wol.

Long toktok namel long tupela lida long telepon, President Obama i bin tok Amerika bai helpim olpela na gutpela pren bilong en, Frans na pipel bilong em long ol kain rot em i laikim long sait bilong mekim ol wok paini-



maut.

Ol birua i bin kamap tiata o ples bilong lukim muvi-Stade de France na 4-pela arapela ples long namba 10 na 11 distrik.

Long Stade de Frans, Gemeni i wok long pilai soka egens long Frans na President Hollande i bin lukim pilai i stap long dispela taim na ol i bin rausim em hariap long hao taim ol i harim nius long birua.

was at the game at the time and was evacuated.

Planti witnes i tok ol i bin ting olsem ol i harim ol paia

kreka na i no tru tru birua inap ol i lukim ol manmeri i ran i go ausait long strit.

Polis long Paris i salim tok-tok long pablik long noken go aut nating nating na ol i pasim ol pablik bilding na tren sistem long Paris.

Dipartmen bilong Homeland Security si monitaim sekyuriti na situesen long Paris, maski i no gat dairek trabel i go long Amerika.

President Obama long White House las Fraide i bin tok i no gat kliapela nius yet long as bilong dispela birua, U.S. i sanap wantaim Frans

"long pait egensim teroris na ekstrimis lain."

Obama i tok Frans "i wanpela patna kantri i pait egens long terorisim.

"Paris i wanpela ples we man i save kamapim ol nupela samting long ol wok go het long wol. Ol pipel bilong Amerika i save kisim strong long ol pipel bilong Frans na komitmen bilong ol long laip, gutpela na fri wol na amamas.

Ripot i tok FBI i sanapim wanpela koman pos long helpim monitaim na kisim ol rispons long ol birua ya.



ISIS tok grup i kamapim dispela birua long Paris em 'Namba wan long ol birua'

TERORIS grup, ISIS, insait long wanpela stetmen o ripot i tok ol yet i karimaut dispela birua long Frans we i kilim dai klostu 130 pipel.

Long ripot ol i dsalim long intanet, ol i tok dispela birua i gat blesing long en na tolls soldia i tagetim "kapitel bilong pamuk pasin na ol pasin no gut, kerisa long bona bi-

long Kros long Yurop."

Stetmen i tok birua em i namba wan tasol ol i karimaut olsem "tok lukaut long ol lain husat i mas gat lesen long lainim long en."

Vidio long Tok Inglis i ripitit "hate" mesej na nek bilong man i toktok olsem em i bilong Not Amerika. Prosekyuta long Paris, Francois

Molins, i tok ol ganman i bin plening gut na operet long tripela grup long kamapim birua long 6-pela ples long Paris. Long wanpela bilong ol em Bataclan Konseset Hol, ol teroris i bin kolim Syria na Iraq. Wanpela bilong ol teroris em ol i luksave long en olsem wanpela man i gat 30 krismas na i sitisen bilong

Frans.

Prosekyuta Mollins i tok ol 7-pela teroris i bin dai long dispela birua taim ol i wok long karimaut teroris wok bilong ol. Na stetmen bilong ISIS i tok em i tru. Dispela 8-pela brata i bin stap insait long operesen olsem midia i tok em i tru we 129 pipel i dai na moa long 350 pipel i kisim

bagarap.

Ol opisel i tok dispela teroris i gat 30 krismas na i wanpela sitisen bilong Frans em ol i bin luksave long en 5-pela yia i go pinis olsem wanpela teroris, tasol ol i no bin sasim em long wanpela kram o trabel.

Prosekyuta Mollins i tok wanpela opisel bilong Greece

i tok wanpela long ol teroris wantaim paspot bilong Syria i bin kam olsem long Leros Ailan bilong Greece i go long ol Yuropien Yunien kantri olsem wanpela refuji.

Ol sapota bilong ISIS long dispela yia i wokim ol toktok long wokim samting nogut long Frans na ol kantri long West.

Ol stori na poto: ABC

Ol jet bom bilong Frans i tagetim ol ISIS long Syria

FRANS i wok long bomim ol ISIS taget long Syria bihain long plis i lonsim wok long painim ol birua saspek i stap insait long birua long Frans.

Ministri bilong Difens long Frans i tok em i tagetim ol koman pos na trening kem bilong ol teroris, tromoim ol bom long Raqqa long Syria em kapitel bilong ISIS. Wanpela long ol namba wan taget em koman pos, riktuting senta bilong Jihad na we-haus bilong ol samtiung bilong pait, Ministri i tok.

Ol i bin lonsim 10-pela jet paita balus bilong Frans long wankain taim long Yunaitet

Arab Emirets na Jordan insait long wanpela operesen we ol i wok bung wantaim militeri o ami koman bilong Amerika.

Nesanel polis bilong Frans i tok ol i wok long painim Salah Abdeslam, i gat 26-krismas bilong Frans we mama i karim long Belgium, Brasels na i stap insait long birua i kilim klostu 130 pipel i dai.

Foren Minista bilong Iraq, Ibrahim al Jaafari i tok pas-taim long dispela birua, ol i lukim ol lain i bin stap insait long birua long Belgium na Frans wantaim.

Moa long 500 yangpela bi-

long Belgium i lusim kantri na go pait long Syria.

Hetman bilong Katolik Sios long wol, Pop Francis i autim bikpela toksori bilong em i go long Frans na ol lain famili i bin lusim ol famili memba bilong ol.

"Mi sori tru long o famili na ol arapela i lusim ol lain bilong ol long dispela teroris birua."Kain noggut tru birua em wol i kirap nogut long en na yumi i askim yumi yet olsem olsem wanem na lewa bilong man i ken wokim dispela kain pasin we i mekim kirap tru Frans na wol," Pop Francis i tok.

POLICE NATIONALE

APPEL À TÉMOINS

ABDESLAM SALAH
 né le 15 septembre 1989
 à Bruxelles (Belgique)

Individu faisant l'objet d'un mandat de recherche

SIGNALEMENT :
 1 m 75, yeux marron

CONTACT :
 Si vous disposez d'informations permettant de le localiser, contactez immédiatement le 197 Alerte attentat.

Individu dangereux, surtout n'intervenez pas vous-même.



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Ren i pundaun na mekim ol Melanesian pipel i amamas



Sampela ren i pudaun long taim bilong bikpela san o drought.

Caroline Tiriman i raitim

PLANTI pipel long Melanesia nau i amamas tru long lukim ren bihainim drought oa nogat ren i pudaun long planti mun nau.

Olsem yumi olgeta i save pinis, planti kantri long Pasifik rijon, na tripla kantri long Melanesia, olsem PNG, Solomon Ailan na Vanuatu i no bin lukim ren long planti mun pinis, tasol nau ren i pudaun na planti pipal i amamas tru.

Long Hailans rijon, tupela hevi i bin hamarim ol pipel em long bikpela sun na tu bikpela kol o frost we i bin bagarapim planti gaden kaikai na mekim ol wara i drai. Sampela i tok dispela drought i winim ol narapela bikpela drought long 1987.

Sampela stori i wok long tok tu olsem, dispela taim nogut em El Nino i kamapim bai go het inap long namel

bilong 2016, tasol ol mansave bilong weda olsem Dairekta bilong National Weather Sevis long PNG, Sam Maiha i bin tokim Redio Australia olsem samplea ren bai stat long pudaun long mun bihain.

Long ol dispela mun i go pinis, mipela i save ripot olgeta taim long drought na frost long Hailans rijon, na Sauten Hailans provins i wanpela long ol ples em drought i hamarim ol gut tru, tasol nau ren i kamap na em i mekim ol pipel, olsem bisnisman Lucas Martin long lap na hmamas tru.

Vanuatu i wanpla ples tu we ren i no pundaun long sampea taim na kamapim hevi long ol pipel, tasol ren i pundaun long hap tu, na wanpela lida bilong Presbiterian sios long Vanuatu, Pastor Kalorongo Ova i tok ol i amamas tu long kisim ren nau.

Atonomas Bogenvil Gavman i kisim Law na Jastis plen



Presiden bilong Bogenvil, Dokta John Momis na ol narapela pipel bilong Bogenvil.

Caroline Tiriman i raitim

Atonomas Rijon bilong Bogenvil i bin lonsm wanpela tingting o plen blong kamapim ol lo na jastis sevis bilong en long ol dispela foapela yia i kam.

Dispela program i stap aninit long opis bilong Papua New Guinea-Australia Lo na Jastis Patnasip (PALJP) – Trensisen Program.

Dispela opis i tok as tingting bilong givim ol pipel bilong Bogenvil ol strongpela sevis bilong lo na jastis i go inap long 2019.

Narapela bikpela tingting em bilong stretim na strongim ol wok bilong polis na ol Komyuniti Koreksen. Minista iblong Jastis, Willie Masiu, i bin opim dispela bung na Menesa na senia jenelis bilong New Dawn FM radio stesen long Bogenvil., Aloysius Laukai, i bin stap long dispela seremoni na em i tok ol gavman opisa bilong Australia Hai Komisin long Pot Mosbi wantaim ol narapela senia gavman opisa bilong Nesenel na ABG gavman i bin stap tu long dispela seremoni.

PNG West New Britain Provins bai kisim ol medikel saplai

Caroline Tiriman i raitim

OL displea saplai bai helpim ol haus sik long provins long sait bilong marasin na ol bet long haus sik.

Gavana bilong West New Britain provins, Sasindran Muthuvel i tok em i amamas tru long wetim ol medikel kontena i kam long Amerika long helpim wok bilong helt long provins bilong en.

Gavana Muthuvel i tok em i wokbung wantaim tupela lain, Project CURE na PNG

Tribal Foundation long kisim ol displea medikel saplai long ol dispela mun i kam.

Narapela ples long PNG em bai kisim tu ol medikel kontena em long Sauten Hailans provins.

Project CURE i stap olsem bikpela wok we em i save salim ol medikel saplai na ol masin bilong ol haus sik long ol developing kantri long wol, taim PNG Tribal Foundation i save wok bilong helpim wok bilong helt na edukesen long Papua New Guinea.

Pasifik Woka Skim i helpim ol Ni-Vanuatu

Caroline Tiriman i raitim

PASIFIK woka skim long Australia i helpim gut ol pipel bilong Vanuatu husat i bungim tupela bikpela hevi bilong saiklon Pam na tu, long drought o taim bilong bikpela san we i hamarim kantri nau.

Dispela em toktok bilong wanpela Ni-Vanuatu bisnisman husat i save helpim ol pipel bilong Vanuatu long kam wok long Australia aninit long displea skim.

John Salong i tok klostu 8-pela mun bihain long saiklon

i bin bagarapim Vanuatu na planti pipal i bin lusim ol haus bilong ol, ol i no bildim bek ol nupele haus bilong ol yet.

Australia na Nu Silan i bin kamapim dispela kain wok long helpim ol pipel bilong Pasifik ik am wok long ol fam long displea tupela kantri long helpim ol famili long rijon i kisim mani.

John Salong i stap nau wantam sampela Ni-Vanuatu woka long Saut Australia we em i tokim Redio Australia olsem Vanuatu i bungim planti hevi nau.

Apil keis bilong ol Vanuatu MP i go het



Tupela Apil Kot jas long Vanuatu

Caroline Tiriman i raitim

APIL keis bilong ol memba bilong Palamen bilong Vanuatu i stap nau long kalabus i go het long namba tu de.

Suprim Kot i bin painim olsem 14 memba ya i giliti long Oktoba 22 long korapsen na braiberi bilong ol bikman.

Niusman Hilaire Bule i tok ol memba ya i no bin kamap long kot long tupela de, tasol ol loya bilong ol tasol i wok long putim keis bilong

ol long kot.

Tasol em i tok sampela memba long famili bilong ol bin go tu long harim kot.

Loya bilong tupela memba we kot i harim sabmisien bilong tupela long las Fraide, Steven Loemae, i tok Jastis Mary Sey i bin rong long harim toktok bilong tripela memba husat prosekyusen i bin yusim.

Em i tok dispela em long wanem ol memba ya tu i bin kisim mani long Moana Carcasses.

PNG Gavman bai givim ol sid we i no nap dai long taim bilong bikpela san

Caroline Tiriman i raitim

KLOSTU nau na gavman bilong PNG bai stat long givim aut ol sid bilong ol kumu na ol narapela kaikai em ol i no nap bagarap long taim bilong draut o taim bilong bikpela san, Dokta Sergie Bang, Dairekta Jeneral bilong Nesenel Egrikalsa Risets Institut (NARI) i tok.

Klostu nau na gavman bilong PNG bai givim ol siut i go aut.

Gavman i wok bung wantaim NARI long dispela program na ol i ting bai ol i stat long givim ol dispela sit long

tupela mun i kam.

Narapela samting em Gavman i tingting long kamapim em long putim ol gutpela ples bilong putim wara long ol oa ol resova we ol pipel i ken kisim wara long taim blong draut.

PNG, Solomon Ailan na Vanuatu nau i wok long bungim bikpela sot long wara na tu, planti pipel i hangere long taim bilong bikpela san.

Dokta Bang i tokim Redio Australia olsem ol despela sit bai karamapim ol kain kaikai olsem kon, kaukau, bin, ol kepsikam na planti ol narapela kaikai olsem.

Ol loya bilong 14 Ni-Vanuatu MP i tok egensim mekim save

Seke i raitim

OL i bin kalabusim ol dispela Palamen memba bihainim braiberi na korapsen sas long ol.

Ol loya bilong ol wanpela ten foa memba bilong Vanuatu Palamen em Suprim Kot i bin salim ol long kalabus long braiberi na korapsen i stat nau long mekim ol strongpela agensim konviksen na mekim save bilong ol.

Loya bilong Moana Carcasses Kalosil husat i bin go pas long displa tingting bilong braiberi i bin toktok strong olsem mani we Mista Kalosil i bin givim ol memba em i lon o dinau mani, na i no braiberi mani.

Tasol ol Apil Kot jas em tripla jas bilong Australia na Nu Silan i stap long en i go het long askim tu long ol evidens bilong braiberi we i bin kam aut long Suprim Kot.

Pasin kalsa i stopim ol Vanuatu meri i wok long ol fam long Australia



Ol Ni-Vanuatu Seasonal woka long Australia. Ol piksa ABC

Caroline Tiriman i raitim

PASIN bilong ples o kalsa i mekim i hat liklik long ol meri bilong Vanuatu i wok aninit long Pasifik Woka skim long Australia, John Salong, wanpela bisnisman bilong Vanuatu i tok.

Mista Salong, i save helpim ol pipel i kam wok long Horticulture industri long Australia.

Australia na Nu Silan i bin kamapim dispela kain wok bilong helpim ol pipel bilong Pasifik i kam wok long ol fam

long dispela tiplea kantri long helpim ol famili long rijon i kisim mani.

Plantu long ol pipel bilong Vanuatu i save wok long fam we ol i save rausim o havestim ol kumu, taim sampela gen i save wok long ol prut fam.

Mista Salong i tok sapos ol meri i save kam wok long Australia, bai ol i mekim tupela wok, wanpela em long wok long ol fam na bihain taim ol i go bek long haus bai ol i wok gen long hap.

Nupela ATR balus pundaun long Moro

Aja Potabe i raitim

NUPELA ATR-72-600 balus bilong PNG Air i bin pundaun long Moro, Sauten Hailans Provins long las wik Fonde.

Bihain long Moro ples balus, em i bin go long Girua ples balus long Popondetta, Oro provins.

Girua na Moro i kamap laspela ples balus we dispela nupela ATR-72-600 i go pundaun long mekim ol tes flait bilong en.

Em i bin go pundaun pinis long Nadzab (Lae), Gurney (Alotau), Madang, Daru, Kiunga, Kagamuga (Mt Hagen), Boram (Wewak), Hoskins, Tokua (Rabaul), Lihir na Goroka ples balus long testim dispela nupela balus we PNG Air i kisim i kam long kantri Frens.

I nogat dispela kain ATR balus i stap long PNG na dispela em wanpela namba wan ATR balus i kam long PNG.

Dispela balus i ken pulapim 72 pasindia. Long dispela flait i go long Moro ples balus long namba wan taim, em i kisim moa long 60 pasindia.

Moa long dispela, ol pasindia i bin ol wok manmeri bilong PNG Air yet. Menesmen bilong PNG Air i laik amamasim ol wok manmeri na i bin larim ol wok manmeri i go raun long Moro na kam bek.

Balus i bin lusim Jackson's ples balus long Pot Mosbi long 9 kilok moning na i pundaun long Moro long 11 kilok.

Taim balus i pundaun long Moro, tupela paia trak i kap-saitim bikpela wara long balus long soim sain olsem



Nupela ATR bilong PNG Air i pundaun i stap long Moro ples balus, Sauten Hailans Provins.

Moro ples balus i tok welkam long dispela nupela balus.

Long Moro, ol ensinia bilong balus i bin soim ol wokman bilong PNG Air long Moro long we bilong opim na pasim dua bilong balus na arapela ol sefti samting.

Taim balus i lusim Moro, em i kambek long Pot Mosbi

na i go long Popondetta we Oro Gavana Gary Juffa i bin sindaun long dispela namba wan flait i go long Girua ples balus.

ATR i bin gat plen long balus bai go pundaun long Tari ples balus long las wik Fonde, bihain long em i go pundaun long Moro ples

balus, tasol sampela senis i bin kamap na ol i no bin go long Tari.

Ol pipel long Tari i harim olsem nupela ATR 72-600 bai kam na ol i bin wet i stap long lukim dispela balus tasol em i no bin go pundaun.

Komyuniti lida long Tari taun, Rex Humbi i tok planti

manmeri i bin harim olsem nupela balus bilong PNG Air bai kam long Tari na ol i bin wet i stap long lukim na kisim piksa.

"Mipela i bin ridim long Wantok Niuspepa olsem nupela ATR balus bilong PNG Air bai kam long Fonde las wik tasol em i no bin kam," Mista Humbi i tok.

Kutubu manmeri amamas long PNG Air

OL manmeri long Moro na Lake Kutubu eria long Sauten Hailans Provins i bin kirap nogut na amamas long lukim nupela ATR 72-600 balus bilong PNG Air i go pundaun long Moro ples balus las wik Fonde.

PNG Air (bipo ol i kolim Airlines PNG) em i save helpim ol manmeri long dispela wel projek eria. I nogat narapela balus i save wokim komesal flait o karim ol pablik pasindia i go kam long Kutubu na Pot Mosbi.

PNG Air tasol i save sevim ol grasruts manmeri long Moro na taim ol i lukim dispela nupela balus planti ol manmeri husat i bin stap arere long ples balus long las wik Fonde i bin amamas stret.

Wanpela komyuniti lida bilong Moro Elizah Yore i tok ol pipel i amamas long lukim dispela nupela balus i kam long Moro long sevim ol.

Mista Yore i tok Air Niugini na arapela balus i no save mekim komesal flait tasol ol manmeri long Kutubu i save kisim balus o ea sevis long PNG Air.

"Mipela i amamas stret long PNG Air. PNG Air tasol i save mekim ran i kam long Moro na em i laik sevim mipela gut na baim dispela nupela balus.

"Em i wanpela gutpela samting stret PNG Air i mekim. Mipela lokol komyuniti long Moro bai lukautim ol wokman bilong PNG Air na ol samting bilong ol bikos PNG Air tasol i luksave long mipela na i wok long sevim mipela.

"Mi amamas long dispela tasol mi laik askim sapos menesmen bilong PNG Air i ken daunim prais bilong baim balus tiket long go kam long Moro na Pot Mosbi," Mista Yore i tok.

Mista Yore i tok PNG Air



Tupela komyuniti lida bilong Moro na Lake Kutubu eria, Timothy Dosabo (lephan) na Elizah Yore (raithan) i sanap wantaim ol arapela man long Moro ples balus.

tasol i save sevim ol pipel bilong Kutubu na em i amamas long dispela nupela balus i kam pundaun long Moro bikos dispela nupela balus em i moa seif.

"Taim nupela balus i kam pundaun long Moro, em i soim olsem PNG Air em i stap wantaim pipel bilong Moro na Kutubu. Mipela i amamas long balus i kam long Moro.

"Tasol mipela i laik singautim ol bod na menesmen bi-

long PNG Air long daunim prais bikos i no olgeta manmeri long Moro i papagraun bilong Kutubu wel projek na PNG LNG Projek.

"Sampela manmeri i no save wok. Ol i manmeri nating long ples. Sampela manmeri long Moro i no save kisim royalti o ekwiti mani bilong wel na ges projek i kamap long Kutubu," Mista Yore i tok.

Long wankain taim, ol manmeri Hela tu harim

olsem nupela dispela ATR balus bai sevim ol tu na planti grasrut manmeri long dispela LNG Projek eria i amamas stret long dispela balus.

Wanpela komyuniti lida long Tari taun i tokim Wantok Niuspepa olsem ol Hela pipel i amamas na redi long kalap long dispela nupela balus bikos ol narapela balus kampani i save sasim ol bikpela mani tru long kam long Pot Mosbi.

Kaunsila bilong Tari taun,

Hebe Priko i tok: "Ol narapela balus kampani i save sasim bikpela prais bilong baim balus tiket long kam long Pot Mosbi na mipela i harim olsem PNG Air bai daunim prais.

"Mipela amamas long PNG Air bai nau sevim ol pipel long ples. Em i wanpela gutpela sevis tru ol pipel i nidim. Ealain sevis wantaim sip prais bilong baim tiket em i wanpela gutpela samting ol Hela pipel i laikim."

Kina grup i opim nupela logo

Esther Bralyn Wani i raitim

KINA Sevis Limitet i lonsim nupela logo o mak long Fonde las wik. Dispela senis i makim namba 4 bikpela benk bihain long ol i kisim Maybank PNG.

Olsem namba wan fainensel sevis kampani bilong PNG long stap insait long lista bilong stok eksens long PNG na Australia, Kina i kamapim gutpela stori. Narapela sevis i bung long olupela sevis, i givim sans long bikpela fainensel sevis.

Sif Eksekutiv Opisa (CEO) bilong Kina Grup, Syd Yates i tok dispela nupela logo i amamas na soim stat bilong ogenaimesen taim ol i putim em long sapatim bihain bilong PNG na ol pipel.

Mista Yates i tok, 'Bikpela

populesen bilong PNG i painim gutpela na bikpela ol fainensel sevis, na nupela Kina i givim sans long ol kastoma long joinim wanpela lokal ogenaimesen wantaim wok i go het na i ken isi long kisim ol fainensel sevis.'

Nupela Kina bai operet insait long tupela divisen, Kina Benk na Kina Welt, we bai ol i givim planti ol prodak na sevis olsem seving akaun, mogij, ol bisnis lon, insurens, stokbroking, fainensel edvais, invesmen menesmen na ol fan administresen.

Long wankain taim, Siaman bilong Kina Grup, Sir Rabbie Namaliu i tok, 'Mipela i amamas long nupela logo. Em i soim komitmen i go long bihain bilong PNG.'

'Mipela i laik helpim PNG

long fainensel sait, long wanem logo i soim wanem PNG i olsem bikos em i kamap insait long PNG. Em i bilong promotim PNG,' Sir Rabbie i tok.

Mista Yates i tok 250 wokman na meri i amamas long dispela nupela logo na ol kala bilong en.

Liklik toktok antap long logo 'together it's possible' i olsem promis long ol kastoma, strongim rilesensip i kamapim stat bilong Kina logo.

Dispela logoing i kamap wantaim nupela websait kina.com.pg na i kamap wantaim intanet benking long mykina.com.pg na nupela investa senta we ol seaholda na ol stekholda i ken monitorim Kina Sekyuriti Limitet (KSL) prais na ol toksave long investors.kina.com.pg.



Sir Rabbie Namaliu, CEO Syd Yates na ol woklain long taim bilong opim nupela logo

Usino-Bundi papagraun mas lukautim gut nikel projek

KOMYUNITI Afes Supevaisa bilong Ramu NiCo Kurumbukari Main long Madang Provins, Greg Tuma i tok tok strong olsem ol papagraun bilong Usino-Bundi i mas amamas long nikel na kobalt projek i stap long ples bilong ol na no ken kamapim lo na oda hevi na stil long samting bilong di-velopa.

Mista Tuma em wanpela bilong ol saveman bilong Bundi, na papa graun bilong KBK Main, na tu wanpela komyuniti lida.

Mista Tuma i autim dispela tok tok long wanpela awenes bung bilong lo na oda hevi i wok long kamap insait long KBK Main projek area we i kisim tu Enikuai na Daunagar Rilokesen ples bilong Ramu NiCo projek. Awenes tim em KBK Main Komyuniti Afes, Waliu gamman opisa, na polis em mak olsem 150 manmeri i kamap.

"Mi stap wantaim Marengo Main tasol mi kam bek long KBK Main bikos mi olsem wanpela asples man, mi wari tru na laik wok long rausim ol dispela hevi bilong lo na oda long hia. Mi laik stopim stret pasin bilong dring bia, hombru na mariwana."

"Mipela mas i no ken stap tasol na lukim hevi bilong lo na oda kamap bikpela, hevi kain olsem iligel treading, dring bia, na brukim tambu bilong Provinsal Liquor Laisensing bod long stopim ol stua long salim bia insait long KBK Spesel Maining Lis (SML) eria," Mista Tuma i tok.

"Mi no laik lukim wanpela man i bagarapim komyuniti, na taim yu kamapim hevi yu no save stap long stretim,"



Greg Tuma bilip long bihain-taim bilong Usino-Bundi wantaim gutpela sindaun.

"Mipla i no laik stap long asples bilong mipela taim kain hevi i wok long go het yet. Olgeta pikinini mas i go long skul, ol meri i mas amamas long wokabaut raun, bikos em ples bilong mipela na mipela mas no ken pret long raun nating." Mista Tuma i tok.

"Mipela bai kisim polis na rausim ol. Mi gat driman long Usino Bundi mas kamap seif ples wankain olsem bipo. Ol liklik meri i go long lapun i mas stap insait long gutpela pasin na amams oltaim," em i tok.

Mista Tuma i tokim ol papa graun olsem Ramu NiCo Menesmen (MCC) i wok aninit long lo. Sapos sampela hevi i kamap ol, polis bai mekim save long lain i brukim lo.

Mista Tuma i tokim ol papa graun olsem Ramu NiCo bai stat long kisim ol lokal pipel wantaim gret 8 setifiket na go antap na em i askim ol manmeri long stat lukluk long apgretim ol mak bilong ol long go long dispela level na salim ol pikinini i go long skul long inapim askim bilong KBK Main.

Kirapim edukesen long ples



Ol pkinini sindaun na lukim ol lain long ExxonMobil i katim ribbon bilong nupela klasrum long Para Praimeri Skul.

OL skul pikinini long Para Praimeri skul insait long Hela Provins nau i ken skul gut na tok tenkyu i go long ExxonMobil PNG Limited (EMPNG) long givim ol nupela klasrum.

Ol wokman na wokmeri bilong ExxonMobil PNG Limited (EMPNG) i bin givim wanpela nupela dabol stori klasrum i go long Para Praimeri Skul insait long

Hela Provins.

Para Praimeri Skul hetmasta Paul Paku i tok tenkyu long EMPNG long sapotim wok bilong kirapim wanpela dabol klasrum.

EMPNG Hides Gas Kondensing Plant Suptendent, Martin Sagayaraj i tok strong long ol sumatin na ol tisa na komyuniti long lukautim gut ol haus na

samting bilong sku.

"PNG LNG Projek em i amamas long kamap hap bilong komyuniti na long wanpela we bilong holim strong wok bung wantaim em long givim mipela ol kain sevis sapot olsem," Martin i tok.

EMPNG i no longtaim i go pinis i bin helpim wantaim tupela haus tisa long Para Praimeri Skul.

CPL Grup lonsim bikpela promosen

CPL Grup i tokaut long wanpela bikpela promosen we wanpela wina inap long winim wanpela 3-betrum kit haus i kam long Kwik Built long manmak bilong K100,000 wanpela Nissan Navara D40 i kam long Ela Motors long mani mak bilong K100,000 na K50,000 kes mani.

Wantaim olgeta K50 soping long baim samting long CPL stua olsem City Pharmacy, Stop N Shop, Hadwea Haus, Haus Depot, Paradais Sinema, Jack's of PNG

na Boncafe bai kastoma i gat sans long winim ol dispela gutpela prais.

Olgeta CPL stua i kam bung wantaim long kamapim wanpela promosen we tasol na ol kain bikpela prais em i wanpela gutpela samting insait long dispela yia long kisim wanpela bikpela promosen program bilong CPL Grup.

Promosen i stat long Novemba 13, 2015 inap long Januəri 20, 2016. Gren o bikpela dro bai kamap long Januəri 16, 2016.



Nupela promosen menesa bilong CPL, Bob Kerwin. Foto: Nicky Bernard

PNG meri kamapim senis long marin komyuniti

Frieda Sila Kana i raitim

PNG nau i wok strong long lukautim na banisim ol samting insait long solwara na ol nambis bilong em.

Maxine Anjiga, Eksekutiv Dairekta bilong PNG Senta bilong Lokali Menes Eria (PNGCLMA) na Pasifik meri edvaisa bilong Global Grin Gren Fan long Pasifik, i wokim wanpela wokabaut i go long Yunaitet Stets bilong Amerika (USA) long bungim ol olupela na nupela dona bilong strongim wok long lukautim na banisim ol samting insait long solwara na long nambis bilong Wes Pasifik, wantaim ol patna long wol.

PNGCLMA em i memba bilong Global Lokali Menes Eria Netwok (GLMAN). Pas-taim tru dispela ogenaiesn i bin was long ol solwara na nambis bilong Westen Pasifik, tasol nau em i go long Madagascar na Puerto Rico long Saut Amerika na Myanmar long Is Esia olsem na ol i kolim Global Lokali Menes Eria Netwok (GLMAN). Mis Anjiga em i Kantri Kodineta bilong GLMNA long PNG.

Dispela ogenaiesen i save wok long ol kantri we i stap insait long Koral Traiengel Inisetiv straksa we i gat 6-pela kantri i stap insait. Ol dispela kantri em; Filipins long antap tru, kamdaun long Indonesia, Timor Leste, Papua Niugini, Malaysia Solomon Ailan.

"Dispela em ol Wol Hot spot bilong ol marin baio-daiversiti eria. Long 2009 Presiden bilong Indonesia askim long ol i sainim agrimen long lukautim ol dispela marin laip na PNG Praim Minista long dispela taim, Gren Sif Sir Michael Somare i bin wanbel long dispela na i sainim agrimen.

Wantaim klaimet senis, olgeta samting long solwara na arere long solwara insait long ol dispela kantri i wok

long taitim bun long stap laip. Tasol long olgeta hap long graun em ol samting long solwara i wok long dai nating tasol bikos long hevi i kamap long klaimet i senis. Ol i sapotim planti bilien pipel husat i stap insait long ol dispela kantri taim ol pis na ol narapela samting bilong solwara i stap laip.

Stat long Sarong long het bilong ailan Niugini i go daun long tel bilong Samarai i gat 15 maritaim provins tasol nau yet, PNGCLMA opis i wok long 6-pela bilong ol dispela 15 provins tasol. Ol Lainim Trenim Netwok i stap long Madang, Wes Nu Briten, Manus, Milen Bei, Noten Provins, Nu Ailen, Noten Provins.

PNGCLMA i wok wantaim opis bilong Konsevesen na Envairomen Proteksen Atoriti (CEPA) long ol wok bilong helpim ol komyuniti long hap we ol atoriti i banisim long ol man i no ken bagarapim (Marine Protected Area) na eko sistem wok na long ol marin lukaut hap bilong solwara, wantaim ol samting we bai inap dai na pinis isi, Opis bilong Klaimet Senis na Di-velopmen i lukautim wok bilong klaimet senis.

Korol Traiengel i gat straksa na aninit long en i gat wanpela trening program, 'Lainim na Trenim Netwok' i save wok wantaim ol maritaim (15) provins nau wok wantaim olgeta pipel long komyuniti. Olgeta samting bilong lainim bai kam long ol pipel bilong ol dispela projek eria na ol i seim wantaim-narapela komyuniti tu.

PNGCLA em Seketeriet bilong PNG Marin Program bilong Lainim na Trenim Netwok na i wok wantaim gavman long nesanel level. Eksekutiv Dairekta i save kodinetim olgeta tok tok bilong lainim we ol komyuniti i save bungim bilong givim i go long gavman.

Aninit long Global Grin

Gren Fan em ol liklik komyuniti inap aplai long wanpela projek mani inap long mak bilong US\$5,000 long mekim wok bilong marin envoironmen, klaimet senis long statim projek tasol na bihain ol i ken kisim moa mani long ol narapela ejensi na gavman.

Wokabaut bilong Mis Anjiga long USA, bai go long ol ples long Amerika em bai go miting long San Francesco, Denver, Colorado long hetkwata bilong Global Grin Gren, long bungim ol wokman na wokmeri wantaim ol bot memba na bihain bai em i go long Nu Yok siti na stap tupela de wantaim ol dona bilong GGG.

Long dispela siti, Mis Anjiga i bilip olsem em bai bungim sampela lain husat i gat laik long save long wanem samting ol lokal komyuniti i mekim nau long senis we bai kamap wantaim maining projek we bai kamap long Nu Ailan provins aninit long solwara. bai stori wantaim ol dona na sapota bilong Global Grin Fan long ol wok we ol meri bilong nambis na solwara i wok long mekim long lukautim ol risis bilong solwara na tu long wanem kain we ol i wok long helpim ples bilong ol long sanap strong long taim bilong klaimet senis.

Em bai painim tu sampela moa dona na sapota long helpim wok long PNG.

"Toktok bilong PNG LNG em i kamap na i go pinis. Nau long wol em olgeta lain i lukluk PNG bikos em i namba wan kantri long wol husat i wok long kamapim sibat maining o main aninit long solwara," Mis Anjiga i tok.

Em i tok em bai bungim ol lain husat i laik sapotim ol awenes wok namel long ol meri long ol risis menesmen na si-bed maining sapot.

Maxine bai kam bek bihain long 13 de wokabaut long Amerika.



Ramu NiCo kamapim bisnis menesmen trening bilong ol papagraun bisnis

OL LENONA na klen kampani insait long Ramu Nickel Projek i mas wok strong long kontrolim na lukautim mani bilong ol na tu bisnis menesmen long gutpela bilong ol planti arapela papagraun insait long Projek.

Vais Presiden bilong Ramu NiCo Menesmen (MCC) Ltd, Wang Baowen i givim dispela salens long las wik Fraide taim sampela lain bilong ol lenona na klen kampani bilong Ramu Nickel Projek i pinisim wanpela wan wik Bisnis Menesmen Trening Woksop long Madang em Ramu NiCo i putim mani long kamapim.

Insait long tupela wik nau Ramu NiCo i bin peim na redim trening we i lukim ol lain lenona na klen kampani na tu ol lenona ambrela kampani lain i go lainim ol samting long sait long bisnis menesmen na tu pesenel vaiaibiliti.

"Yupela i mas save gut olsem dispela Projek em bilong yumi olgeta. Kampani i helpim yu nau na bihain yu ken helpim ol arapela lain papagraun," Mista Wang i tok.

Vais Presiden Wang i tokim ol lain bilong lenona na klen kampani tu olsem ol i mas wokim stret wok long kontrolim na lukautim fainensal menesmen, sefti wok na gutpela menesmen.

"Bikpela tingting bilong mipela em olsem taim Ramu NiCo Kampani i pinis wok na i go, yupela ol papagraun i ken wok gut na lukautim menesmen blong ol lenona na klen kampani bilong yupela," Mista Wang i tok.

Em i tok olsem taim em i kam long PNG 6-pela yia i go pinis na em i lukim sampela ol senis i kamap long sait long sosel na ekonomik.

"Mi bilip yupela olgeta i luksave olsem PNG em olsem wanpela rurel eria em nau i opim dua bilong en long wol,

"Olsem na mi laik lukim yupela wok hat na bringim kantri bilong yupela i go antap," Mista Wang i tok.

Namba wan trening i bin kamap gut stret we i lukim 30-pela lain bilong lenona, klen kampani na ol wimen in maining (WIM) i stap long trening woksop.

Dispela trening woksop i kamap aninit long lidasip bilong Presiden

bilong Ramu NiCo (MCC), Wang Jicheng na lukaut bilong Vais Presiden, Wang Baowen, na Komyuniti Afes Dipatmen bilong Ramu NiCo i go pas long redim..

Trening woksop em Stotick Kamyia bilong Kamyia Sekyuriti na Risk Menesmen Konsaltensi Sevises i kamapim na i karamapim planti ol gutpela eria long sait long bisnis menesmen na pesenel vaiaibiliti na tu sefti na kontrol bilong fainens.

Komyuniti Afes Dipatmen Jeneral Menesa bilong Ramu NiCo, Martin Paining i tokim ol lain namba wan woksop olsem wanem ol gutpela save ol i kisim long trening bai stap wantaim ol longpela taim. Tasol bikpela samting em ol i mas mekim wok wantaim save ol i kisim long kamapim gutpela sindaun insait long komyuniti na tu insait long famili bilong ol.

Deputi Jeneral Menesa bilong Komyuniti Afes Dipatmen, Yuan Zhi i tok olsem dispela trening woksop long besik bisnis menesmen i stat wantem ol samting ol i lainim na ol skils em ol lain i kisim i mas soim stret long wanem wok bihain ol bai wokim na wok ya i mas karim gutpela kaikai na sevim tru nids bilong ol papagraun insait long Projek eria. Dispela em dri-man bilong Ramu NiCo.

Treina Mista Kamyia i tokim ol lain papagraun olsem bel na tingting bilong em long kamapim kain trening em long helpim ol liklik manmeri blong PNG long wokim kamap gut bisnis bilong ol.

Mista Kamyia i tok em i gat bikpela bilip olsem wanem samting ol lain papagraun na wok lain bilong lenona ambrela kampani i lainim em ol bai kamapim gut wok long en.

Em i givim salens tu long ol papagraun long senisim tingting bilong ol na wok strong long lukim ol bisnis bilong ol i gro.

Mista Kamyia i tok olsem taim ol papagraun i pas klostu wantaim Ramu NiCo, bai ol i lukim planti gutpela samting i kam long sapotim bisnis bilong ol.

"Bikpela salens blong mi long yupela em long lukautim fainens blong yupela gut," Mista Kamyia said.



1



2




3



4

- 1 Grup poto blong ol lain long woksop las wik
- 2 Ol namba wan grup long lenona na klen kampani las wik
- 3 Ol lain makim ambrela kampani long trening woksop stat long Mandé dispela wik.
- 4 Vais Presiden Wang Baowen givim setifiket na treina Stotick Kamyia lukluk



135 KM Slurry Pipeline

KBK Mining

BSK Refinery

Panthers i lusim Idris long NRL kontrak



PENRITH Panthers i lusim pilaia bilong em, Jamal Idris, long Nesenel Ragbi Lig kontrak long stap aut sampela taim long lukluk gut long bihain taim bilong em long NRL.

Oi i bin tok aut long dispela disisen long Mande, bihain long Idris yet i tok long stap aut.

"Mi laikim gem ragbi lig, tasol mi laik stap aut liklik taim," Idris i tok.

"Mi amamas long taim mi stap wantaim Panthers, tasol mi bai no inap pilai sapos ol i no givim 100 pesen taim long mi.

"Mi tok tenkyu long ol i gat

gutpela tingting long dispela taim."

Eksekutyiv Jenerel Menesa bilong Panthers, Phil Gould, i tok klap em i tok orait long risen we Idris i givim long lusim kontrak.

"Jamal em i namba wan pilaia long klap bilong mipela. Em i bin mekim bikpela wok long kisim Panthers i go antap long top 4 long yia 2014," Gould i tok.

"Sampela problem bilong em yet na tu em i bin kisim bagarap i stopim em long taim bilong em long pilai na mi save gut long risen bilong em long lusim kontrak.

"Antap long dispela Jamal em i namba wan pilaia tu bi-long Stet ov Orijin. Mi ting olsem em bai kam bek yet long bihain taim."

Jamal i no pilai long planti gem long NRL long 2015 sisen bikos em i bin kisim bikpela bagarap.

"Nau em i no stap long gutpela taim bilong em long pilai bikos tupela bubu bilong em i dai na tu em i lus long planti rilesensip bilong em," Tim Menesa, Sam Ayoub, i tok.

"Em i nidim dispela taim long malolo liklik na kisim gutpela tingting."

Hungary i kwalifai long 2016 Yurop soka fainel



HUNGARY i daunim Norway 3-1 na i kamap kwalifai long soka fainel bai kamap long Yurop long yia i kam, 2016.

Hungary i bin go long Wol Kap fainel long yia 1986 na i daunim Norway 2-1 inap nau em i kamap namba wan taim bilong em gen long bungim bikpela fainel bihain long longpela taim em i no bin go long fainel.

Pilaia bilong ol Hungary, Tamas Priskin, i opim pilai na i kisim namba wan skoa long 14 minit na dispela em i 17 gol bilong ol insait long 54 intanesenel pilai.

Sevenpela minit bihain long dispela gol i kamap, pilaia bilong ol Norway, Markus Heriksen, i abrus na putim narapela gol gen i go insait long pos bilong ol Norway na skruim poin bilong ol Hungary i go antap long 2.

Fainel bai kamap namel long Hungary na Frans long sam i kam.

Henriksen i lukim asua em i bin mekim na long bekim dispela asua, em i kisim wanpela skoa long 88 minit tasol em i no bungim poin bi-long Hungary.

Norway i pilai strong yet long bungim ol Hungary, tasol ol Hungary i putim narapela gol gen klostu long taim i pinis.

Las taim Norway i bin go long fainel long Yurop em long yia 2000.

Long Tunde, ol Ailan bilong Ripablik i pilai wantaim ol Bosnia- Herzegovina long Dublin bikos tupela i bin kisim wankain skoa 1-1 taim tupela i pilai long Zenica.

Ol plei-of i pinis long Trinde taim Slovenia i bungim ol Ukraine na ol Slovenia i win 2-0.

Toomua i lusim Wallaby



TOP pilaia bilong Australia Wallaby, Matt Toomua, i lusim ol Wallaby na i sainim 3-pela yia kontrak wantaim wanpela Inglis klap ol i kolim Leicester.

Oi i bin tok aut long Mande olsem dispela Inglis klap i rausim Toomua i go na ol bai kisim i kam bek long neks Supa Ragbi sisen.

Em i namba wan pilaia bilong Wallaby na em bai lusim Australia na i go aut bai kamapim bikpela spes long sait bilong Australia bikos jesi bilong Australia i gat nem bi-

long olgeta pilaia bilong em. Tasol, em bai kam bek long ol sisen i kam long kisim ples bilong em.

Kosa bilong Wallaby, Michael Cheika, i putim Toomua long wanpela Wol Kap pilai egensim ol Uruguay long mun i go, na putim Matt Giteau long namba 12.

Tasol, taim Giteau i go bek long Frans Klap bilong em, Toulon, Toomua i laki long mekim wanpela bikpela wok bilong Wallaby long namel long pilai graun long pilai sisen i kam.

Toomua bai stap long seleksien bilong Wallaby em long yia 2019.

Dairekta bilong ragbi long Leicester klap, Richard Coockerill, i tok, "Em i no wanpela hait samting we mipela bai sainim top klas pilaia long bek lain, em bai nogat. Matt i stap long dispela kain grup we olgeta lain bai save long posisen bilong em."

"Em i yangpela man yet na em i gat planti eksperiens long Supa Ragbi na, i save pilai long tes ragbi bilong ol Australia."

Czech i win long Fed Kap

CZECH Ripablik i win long Fed Kap bihain long 5-pela yia na i daunim Rasia 3-2 long kriket long Prague pilai graun.

PILAIA bilong Czech, Karolina Pliskova, i win long singel raba na bihain em i bung wantaim Barbora Strycova long pilai dabol na i winim Fed Kap taitel long nem bilong Czech Ripablik.

Pliskova na Strycova i daunim Anastasia Pavlyuchenkova na Elena Vesnina bilong Rasia 4-6, 6-3, 6-2 na winim namba 4 tropi insait long 5-pela yia.

Dispela em ol Czech i winim namba 9 taitel na ol Rasia i bin winim 4-pela taitel insait long 9-pela fainel pilai bilong ol.

"Dispela em i namba wan taim bilong mi long pilai long Fed Kap na mi amamas long mitupela wantaim i pilai gut," Pliskova i tok.

Strycova i tok, "Mi no gat toktok long mekim bikos mi no bilip olsem mitupela i pilai na winim tropi."

Wol namba 11 Pliskova i kamap namba wan pilaia long dispela de, taim em i bin stap long namba 28 long

renk bilong ol pilaia.

Long singel pilai, Pliskova i pilai gut stret i mekim na tupela i stat long gutpela posisen long dabel pilai, tasol tupela i kisim planti malolo na Rasia i kisim namba wan set.

Tasol, tupela i no givim sans long Rasia long namba tu set i go inap long namba 6 set na i winim dispela tropi.

"Dispela em i wanpela bikpela win long olgeta pilai mi save pilai," Pliskova i tok.

"Mi save pilai strong long winim dispela pilai na nau mi gat bikpela amamas wok bilong mi i karim kaikai."

Oi i rekodim Starc olsem kwik boula

Oi foto: ABC

OL i rekodim kriket pilai bilong Australia, Mitchell Starc, olsem kwik bowla long namba tu kriket tes pilai i kamap namel long Australia na Nu Silan.

Starc i amamas olsem em i kwik bowla long kriket tes pilai, tasol em bai wet longpela taim liklik long ol bai tok orait long em long pilai long 100 mail klap.

Satrc i setim rekod long las wik Sande bowlim bal inap long 160.4kph long namba 3 de bilong namba tu tes egensim Nu Silan long WACA pilai graun.

Satrc i kam klostu long wol rekod bilong Shoaib Akhtar, husat i putim 161.3kph long yia 2003 taim ol i pilai egensim ol Inglan.



Satrc i save bowlim 150s taim ol i save pilai egensim ol Nu Silan bipo, tasol dispela i luk olsem Satrc i bowlim kwik taim na i apim nem bilong tim bilong em na ol poro pi-

laia bilong em.

Shaun Tait na Brett Lee em tupela bowla bilong Australia, i save klokim moa long 160kph na Satrc i kamap klostu long tupela.

LBL i kirapim developmen program

Philemon Tame i raitim

LIG Bilong Laif (LBL)em i spot bilong developmen program we Nesanel Ragbi Lig Australia i stap long Papua Niugini i save go pas long en.

Australia gavman i save putim mani long ranim dispela program long ol skul insait long 4-pela rijon bilong PNG olsem Nesanel Kepitel Distrik (NCD), Goroka, Isten Hailans, Is Nu Briten na long Otonomas Rijon bilong Bougainville. Ragbi lig em i wanpela tul we ol i save yusim long sapatim edukesen long kamapim gupela kaikai.

Developmen opisa bilong NRL i save wok bung wantaim ol tisa long karim aut LBL program long wan wan tem. Ol i save skulim ol pikinini i save stap wantim disabiliti long pilai olsem ol pikinini i save stap wantaim abiliti.

Ol i save pilai long ol pilai graun na mekim ol wok insait long klasrum we em i isi long ol i ken mekim.

LBL nau i painim nupela sans bilong ol sumatin i save stap wantaim disabiliti long pilai long ol ragbi lig ektiviti



Ol sumatin bilong Cheshire Disabiliti Sevis i stap bung wantaim ol developmen opisa bilong NRL. Dispela i soim olsem ol sumatin i save stap wantaim abiliti na ol sumatin i save stap wantaim disabiliti i stap bung wantaim long Lig Bilong Laf Inklusiv de bilong ol long Novemba 12, 2015.

Piksa: Midia na Komyunikesen Opisa long Lig Bilong laif

na kirapim tingting olsem ol i orait na stap bung wantaim long ol dispela ektiviti.

Ol i save menesim LBL long 3-pela rot olsem patnasip namel long Australia Gavman, Nesanel Dipatmen bilong Edukesen aninit long

PNG Gavman na NRL.

Ol grup husat i sapatim dispela program em Gavman Dipatmen na Edukesen ong Otonomas Rijon bilong Bougainville, PNG Ragbi Futbol Lig (PNGRFL), Yuni- vesiti bilong PNG na PNG

Nesanel Spot Institut.

Program Kodineta bilong Cheshire Disabiliti Sevis, Paulus Pasbon, i tok ol i gat moa long 140 sumatin na 85 em ol sumatin i save stap wantaim disabiliti.

Pasbon i tok ol i save pikim



Piksa i soim ol pikinini i save stap wantaim disabiliti i pilai wantaim ol pikinini i save stap wantaim abiliti. Ol poro bilong sumatin i holim bal i bin ran wantaim em taim ol i pilai. Dispela pilai em ol i laik kirapim tingting bilong ol na i laik soim olsem ol i orait long pilai wantaim ol narapela pikinini i stap wantaim abiliti. Piksa: Midia na Komyunikesen Opisa long Lig Bilong Laif

ol sumatin long 8 klok inap long 12 klok ol i save ol i save lusim ol long haus bilong ol.

"Mipela bai salim ol sumatin i go long ol gavman

skul o ol lokal skul taim ol i kisim inap strong long go aut, tasol mipela bai no inap salim ol i go, sapos ol i no kisim strong yet," Pasbon i tok.

POMRFL i pinisim preliminari fainel

Philemon Tame i raitim

POT Mosbi Ragbi Futbol Lig (POMRFL) i pinisim preliminari fainel bilong bilong anda 19, A gret bilong ol man na ol meri divisen long las wik Sande.

I gat moa long 500 manmeri i bin stap long lukim preliminari fainel i bin kamap.

Long A gret bilong ol man, Brothers i strong tumas na i daunim ol Saut, 30-20, na long ol narapela pilai, Royals i rausim ol Kone Stom 14-12.

Bihain long 2-pela minit long namba wan hap bilong pilai, pilaia bilong ol Saut, Frank Tole, i stilim bal na ran inap long 90 mita long putim trai. Kik bilong ol i go insait na ol i stap pas long ol Brothers wantaim 6-pela poin.

Brothers i pait strong long bekim trai bilong ol Saut na long 15 minit bilong pilai ol i putim namba wan trai bilong

ol, tasol kik bilong ol i no bin go insait.

Ol i bungim taim bilong malolo na skoa i sanap olsem Saut i stap pas long hap taim 6-4.

Ol Brothers i pilai strong long namba tu hap we pilaia bilong Pot Mosbi Vipers, Jolam Jerry, i pilai long klap tim bilong em na i putim 3-pela trai.

Banis bilong ol Brothers i slek liklik taim 10-pela minit i stap yet long bungim pinis bilong pilai. Ol Saut i strong liklik na putim 3-pela trai na bringim skoa bilong ol i kam antap klostu long ol Brothers, tasol ol Brothers i stap pas yet wantaim 10 -pela poin na daunim ol Saut. Brothers bai pilai gren fainel wantaim ol Royals.

Long fainel bilong anda 19 divisen, Brothers i daunim ol Paga Panthers 16-12 na Difens i daunim ol Wes 6-4.

Long preliminari fainel bi-

long ol meri em ol Royals i daunim ol Paga Panthers 20-16 we ol Royals i putim tupela trai long ekstra taim long Murray Bareks pilai graun.

Ol Panthers i stap pas taim pilaia bilong ol, Angela Parao, i putim namba wan trai long namba wan minit taim ol i stat pilai.

Taim planti minit i go pinis, ol Royals i bekim trai bilong Panthers wantaim tupela trai na skoa i sanap olsem 8-4 taim olgeta kik i no go insait.

Liklik taim tasol i wet yet long bungim pinis taim bilong namba wan hap bilong pilai na, Parao i putim narapela trai gen na bungim poin bilong ol Royals 8-8 taim kik i no go insait.

Ol Panthers i no westim taim we pilaia bilong ol, Vasiti Meles, i putim narapela trai gen taim ol i statim namba tu hap bilong pilai na kik i no go

insait we skoa i sanap olsem 12-8.

Royals i no laikim ol Panthers long win na pilaia bilong ol, Waula, i putim namba tu trai bilong em na bungim skoa 12-12.

Tupela tim wantaim i traim hat long skruim poin bilong tupela, tasol ol i bungim pinis bilong pilai we ol i givim ekstra taim long pilai.

Ol Royals i putim namba wan trai long namba wan hap bilong ekstra taim na namba tu trai long namba tu hap bilong ekstra taim, na kik bilong tupela trai i no go insait i bringim skoa i go antap long 20.

Ol Panthers i putim wanpela trai taim referi i bloim wisil, tasol dispela i bringim skoa bilong ol i kam antap long 16.

Gren fainel bilong ol meri em ol Royals bai pilai wantaim ol Saut.

Palai i pinis namba 4 long Osenia 7s sempionsip

PAPUA Niugini Palai i pinis namba 4 long 2015 Osenia 7s sempionsip long Oklan, Nu Silan long 5-pela kantri i resis.

Long raun namba 5 pilai bilong ol long Sande, ol Fiji i no bin givim wanpela sans long ol na ol i bin givim 43-0 nil. Fiji i bin givim 40-0 nil gen long ol Palai long narapela raun gen.

Long namba 3 na 4 pilai raun long Sande apinun, ol Palai i daunim ol Kuk Ailan 32-0 nil.

Fiji i daunim Samoa 55-0 nil long fainel na i kisim ples long 2016 Olimpik Gems 7s tonamen long Rio de Janeiro.

Samoa i kamap namba tu ples na Kuk Ailan i kisim namba 3 ples na ol i kwalifai long tonamen bilong Rio Olimpik.

Long wankain taim, ol PNG Pukpuk i pinis namba 4 long 8-pela kantri i resis.

Long las de bilong Osenia 7s sempionsip pilai, ol Pukpuk i win long kwata fainel long Sande moning na daunim ol Kuk Ailan 19-7.

Ol i go antap na bungim ol Australia, husat i daunim ol 36-0 long semi- fainel.

Long apinun, ol pukpuk i daunim ol Samoa, 54-0 long namba 3 na 4 raun.

Australia i daunim ol 50-0 na i kwalifai long 2016 Olimpik Gems 7s tonamen long Rio de Janeiro.

Tonga i pinis namba tu na Samoa i pinis namba 3 we tupela i gat sans long pilai long Rio Olimpik bikos tupela i kisim invitesen long narapela kwalifai tonamen ol bai pilai bipo long Rio Olimpik bai kamap.

CCIC bai kamap long wik i kam

BIKPELA op-sisen ragbi lik resis, Koka Kola Ipatas Kap, bai kamap long 2015 inap long 2016, we em bai stat long mun i kam.

Dispela resis em ol bai stat wantaim Lae na Momase salens long Disemba 18 na pinis long Wabag, Enga wantaim fainel long Februari 21, 2016.

Ol tim husat i gat laik long pilai i rejista wantaim K1000 na ol i laikim ol tim long disositim rejista mani long BSP benk akaun bilong Kap.

GEO bilong CCIC, Timothy

Lepa, i tok 8-pela tim tasol em ol bai pilai long wan wan salens long dispela sisen, na ol tim husat i baim rejista mani kwik taim na soim risit long ol wan wan senta bai pilai.

"Long mekim rejistresen kwik taim, ol tim i mas kam wantaim ol opisal na i afiliat," Lepa i tok.

Long wankain taim, Atonomas Rijon bilong Bougainville, Nu Ailan na Is Sepik provins bai joinim Koka Kola Ipatas Kap (CCIC) resis.

Pilai bai kamap long wan wan pilai graun long Buka,

Kavieng na Wewak.

Lepa i tok moa olsem tripela provins i join i soim olsem CCIC i kamap bikpela resis insait long kantri pinis.

Dispela i minim olsem op-sisen lig i bungim pinis ausait poket bilong PNG na kirapim ol yangpela i gat gupela talent long en.

Lokel lig resis i kamap long Atonomas Rijon bilong Bougainville long bipo taim we sampela namba wan pilaia bilong Kumul i bin kamap long dispela rijon. Ragbi i kamap bikpela

pinis long ol klostu yia i go pinis na Nu Ailan i save kamapim sampela bikpela pilaia bilong Kumul tu, tasol lokel lig em ol i no save pilai.

Insait long Sepik rijon, lokel lig i stap insait stret long lewa bilong ol na planti pilaia i save pilai long ol semi- profesenel na nesanel tim i save kam long not sait.

Nau ol bai pilai long CCIC sisen em ol bai skruim sampela moa stail na skil bilong ol long ragbi lig na dispela em i developmen insait long kantri.



Pilai i kamap namel long tupela tim long Koka Kola Ipatas Kap (CCIC) long yia i go. Dispela pilai bai kamap gen long mun i kam we ol bai stat pilai long dispela yia, 2015 inap long 2016.

Ragbi lig i nupela long ol Filipino

MANILA Storm em i ragbi lig tim bilong ol Papua Niugini sumatin i save skul long Filipin we sampela ol Filipino i stap long Manila i join wantaim na pilai.

Namba wan taim bilong kepten bilong ol Storm, Al Del Castillo Tesoro, long go pas long pilai i bin kamap namel long ol Storm na Hong Kong Residen long Rizal Pak.

"Ol Filipino i ekspiensim nupela spot long namba wan taim, tasol ol i pilai gut tru," Kosa bilong ol Timothy i tok.

"Ol Hong Kong i gat gut-pela ekspiens long pilai na i daunim ol Storm 40-34, tasol ol i no win long bikipela poin.

"Ol Storm i nupela boi tasol ol i strongim banis bilong ol na ol Hong Kong i painim hat long putim trai. Bipo long pinis bilong pilai, ol i bin kisim wankain poin 34-34, tasol ol Storm i bin mekim sampela liklik asua na ol Hong Kong i kisim wan-pela poin na Skruim poin bilong ol i go antap na i win," Timothy i tok.

Sait bilong ol Hong Kong, Tom Partridge i putim tupela trai, Tom Beresford na Yosuke Yamagishi i putim wan wan trai, na Doug Fluker i putim wanpela trai na 6-pela gol long ai bilong 100 manmeri. Elvis William Jensen i



PJ Rodriguez

putim tupela trai na Martin Yami i putim tupela trai na 5-pela gol long sait bilong ol Strom. Greg Ranza na Benny Noki i skruim wan wan trai antap long poin bilong ol.

Manila Storm bai go pilai long Albay Vulcan Ragbi Klap long Disemba 7, we bod memba bilong Filipin Nesenel Ragbi Lig long yia 2013, Ric Raymond Bellen, i putim mani long pilai.

Prais bilong pilai i go long fulbek, Doug Fluker, bilong ol Hong Kong Residen na prop bilong ol Manila Storm, Greg Ranza, long tupela i soim kala bilong pilai stret.

Piksa i soim ol Manila Storm na Hong Kong Residen i bung wantaim bihain long pilai i pinis.

HH i patna wantaim PNGOC na Trukai Industries

Philemon Tame i raitim

HARDWARE Haus (HH) i mekim patnasip wantaim Papua Niugini Olimpik Komiti (PNGOC) na Trukai Industries na i givim sapot i go long 2015 Fan Ran.

Dispela em i namba wan taim bilong HH long kamap patna na i sponsaim namba tu hap we ol i putim kain samting olsem dip fraia, jag, rais kuka, redio, DVD na TV long promosen.

I gat 500 lain i go insait long dispela promosen dro na 10-pela i kamap wina long promosen dro i bin kamap long Hardware Haus long Waigani Sentrel long las wik Fraide.

Ol wina em Raphale Towai na Hilary Tony i winim wan wan dip fraia, Gibsion Jack, Joel Sofitua na Rex Peter i

winim wan wan jag, na Ritchlyn Barrios na Moses Nohof i winim wan wan rais kuka. Ulea Kal i winim wanpela DVD pleia, Elizabeth Israel i winim wanpela redio na Morita Par i winim wanpela TV.

"Long olgeta yia, Trukai Fan Ran i save kisim bikipela sapot long ol bisnis haus na ol pablik. Dispela Fan Ran i no inap long kamap sapos ol bikipela sapot na sponsa olsem Hardware Haus na ol narapela kopret ogenais-esen husat i baim Fan Ran snot na helpim mipela long redim Fan Ran long hap bilong ol," Nesenel Maketing Menesa bilong Trukai, Maryanne Hereva, i tok.

Trukai Fan Ran bilong dispela yia i bikipela we ol lain insait long 16 taun o siti long kantri i wokabaut wantaim long dispela iven.

Na tu, Fan Ran i mangalim plantim man husat i wokabaut wantaim na bringim ol insait olgeta long taim bilong 2015 Pasifik Gem.

"Mipela i skruim moa long 5-pela yia gen long Trukai bai sponsarim PNGOC na mipela i amamas long wok yet wantaim PNGOC long bungim ol pipel na wokabaut wantaim long kamapim wanlain na soim sapot bilong ol long Tim PNG," Hereva i tok.

Ol manmeri i wokabaut long Trukai Fan Ran long dispela yia em i moa long 80, 000 na mi tok tenkyu long ol lain husat i wokabaut wantaim," Komesal Menesa bilong PNGOC, Alex Davani, i tok.

Davani i tok tenkyu tu long Trukai Industries bilong givim 100, 000 Fan Ran snot long PNGOC.



Piksa i soim 3-pela wokman bilong Hardware Haus i sanap long han kais i kam long han sut na Komesal Menesa bilong Papua Niugini Olimpik Komiti (PNGOC), Alex Davani, i sanap long hansut. Foto: Cedric Tei

PNG Open i go antap long Tier 2

PNG OPEN Golf i go antap nau long Tier two long Australia Professional Golfers Association. Na dispela ol ken joinim nau ol narapela olsem Saut Pasifik Open long Nu Kaldonia, Kwinslen PGA, Nu Saut Wels(NSW) na Victorian Open.

Dispela nupela muv bilong

ol tu i kisim nupela tes i kam long SP Bruri taim ol tok aut long nupela sponsa bilong ol long nupela bia bilong ol SP Expot Radler. Dispela bia ol miksim wantaim lemon na em i gat tu pesen tasol bia.

SP Bruri em i bikipela sponsa bilong PNG Open Golf long planti yia pinis na

dispela 22 PNG Open tonomen long 2016 em givim ken 160 tausen Austalia Dolar long dispela bikipela pilai.

PNG Open save pulim planti long ol profesinal pilaia manmeri long Nu Silan na Australia long kam pilai long PNG long winim dispela Golf resis.



Menesing Dairekta bilong SP Bruri, Stan Joyce, i sanim giaman sek mani taim Prait Minista Peter O'Neil na Golf PNG Presiden, Stan Walker, i lukluk. Foto Nicky Bernard.

TABUBIL to PORT MORESBY
More than just flying; Linking you affordably because we care.

One way PGK665.80*
Valid from 15th October to 01st November, 2015
*Taxes inclusive

LinkPNG

"Specials Available now"

Linking our country

Reservations - Toll Free: 1805465 Email: sales.linkpng@airniugini.com.pg
Find us on Facebook: www.facebook.com/linkpng



TRAI TAIM: Namba wan bilong Royals i ronawe wantaim bal na go putim trai. Dispela trai bilong em i kisim ol Royals long pilai long Gren Fainal long wiken i kam.



TENKYU BOS MAN: Seken row bilong Royals i kisim prais bilong em long han bilong bos man bilong ol Austarlia ami.



KAM HOLIM MI: Namba wan bilong ol Royals meri i traim long abrusim pilaia bilong Paga Panthers long semi pilai bilong ol. Royals i win.



PUTIM MI GO DAUN: Bikpela fowod bilong Panthers i brukim banis bilong Royals.




KAM KETSIM MI: Pilaia bilong Paga Panthers i ronawe long pilaia bilong Royals.



KAM SAPOT: Senta bilong Brothers i traim long rausim bal tasol nogat sapot bilong em i kam klostu. Dispela spit pilai bilong em i bringim tim bilong em Brothers long pilai long gren fainal long dispela wiken wantaim ol Royals.



SAUTS PAWA: Fowod bilong Sauts i traim pawa bilong em tasol ol Brothers i stopim em. Sauts i lus long dispela semi fainal pilai bilong ol.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG



Manufactured by



RD Tuna Canners Ltd.

Moa mit na
oil insait



TUNA IN OIL

Hunters i plen gut long 2016 sisen



NUPELA CEO bilong Papua Niugini Ragbi Futbal Lig, Bob Cutmore, i tok SP Hunters i pilai gut long 2015 sisen, tasol nau ol i plen gut long pilai long dispela sisen i kam, 2016.

Cutmore i kisim dispela posisen long las mun na em i lukim olsem em i wok aninit long SP Hunters klap tu, na i tok olsem i gat planti salens we ol Hunters bai bungim.

"SP Hunters em i wanpela tim i go pas long olgeta ol narapela 11-pela tim long Intras Supa Kap resis i kamap long 2015 sisen," Cutmore i tok.

"Hunters i pinisim 2015 sisen long namba tu ples na i lus long wanpela pilai tasol long go kamap long gren fainel.

"Ol i pilai gut. Ol i kisim planti biknem," Cutmore i tok taim.

Ol Hunters i redi pinis bilong mekim lainap insait long wan-

pela wik long mekim pri-sisen trening bilong ol long 2016 sisen.

Em i tok moa olsem, Kosa bilong SP Hunters, Michael Marum, na ol wanwok bilong Marum i mekim namba wan wok na mipela bai no inap long mekim sampela senis. Tasol liklik senis bai kamap long en em mipela bai tokaut bihain taim ol pilaia bai lainap long Pot Mosbi long wik i kam.

"Hunters i kamapim rot bilong ol pilaia long pilai gut na kamap namba wan pilaia. Sapos ol pilaia i go insait long ol bikpela klap long narapela kantri bai soim olsem ol i ken mekim moa wok antap long nomol wok ol i ken mekim. Na dispela bai opim hap bilong ol yangpela man long pilai strong long kam insait long Hunters tim," Cutmore i tok.

Hunters bai lusim sampela pilaia na opisal o, em bai no inap

long mekim sampela senis. Long dispela, em ol bai tok aut bihain long ol i redim na pinisim olgeta wok redi.

"Sampela pilaia i bin askim, tasol mipela bai mekim stret-pela tokaut long taim bilong em stret," Cutmore i tok.

"Mi lukim olsem, taim SP Hunters i stap long top ples long hapim nem bilong PNG Ragbi Lig long intanesenel level, planti gem insait long kantri i kamap orait.

"Populesen bilong ragbi lig klap i kamap bikpela na ol meri tu i pilai long ol klap insait long kantri. Nau mipela bai lukluk long ol dispela pilaia long mekim seleksen na lus tingting long ol bipo rot bilong mekim seleksen."

Kosa Marum i tok long tok aut long 2016 skwad bilong em long dispela wik, bipo long lainim ol long pri-sisen trening bai stat long Novemba 24.

Tupela hit man bilong SP PNG Hunters i stopim pilaia bilong Pride long wanpela pilai bilong ol long las sisen. Nupele CEO bilong PNGNRL i bin amamas tru long ol Hunters na bai wok bung wantaim ol long 2016 sisen.



PMV OIL BILONG YUMI



BOROKO MOTORS	
PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
Website: www.borokomotors.com.pg